

証
治
晰
疑

傳

種

疑

染

證

病

治

八

析

過金署



歲在玄默
澹刊於舊京

傳染病八種證治晰疑序

天下事有舊學極粹而新知無以復加者有新知日闢而舊學相得益彰者非重舊學而輕新知也舊學歷數千年之變遷經數千人之研究其中奧邃實非新知所能驟及惟在取其所長而用之耳中國醫學發明最早岐黃以下代有通人至於今純駁不一雖致爲人所輕視然未嘗無人延此道於一息者則以方書所載各有所長但精一科足重於世尙上之人因而鼓舞獎勵之未有不蒸蒸日上者余久有此志以世方多故而不暇及然尙未嘗一日忘之也去冬及今春綏遠一帶鼠疫流行有司備藥延醫如臨大敵交通斷絕者數月稅款運費公私兩傷卒之死人數千借款百萬問以治痊者若干人曰無有也問以何法能愈此病曰無有也江宇澄會長怒焉憂之亟訪於中醫曹子巽軒巽軒曰此等傳染皆有治法乃中醫所專長特爲權勢所屈不能自伸其道爾然而成法具在古賢原未嘗欺人擇而用之是在明達於是宇澄會長遂囑巽軒於西醫所謂急性傳染病八種分證列治以作後學之準繩而爲防疫之紀念巽

軒更商榷於其同志諸人擇成法之最精當者詳述之此卽所謂舊學極粹新
知無可復加者也至古無此證因無成方則曠曾著效驗於此證者編撰之此
卽所謂新知日闡舊學相得益彰者也總期有實效而無虛言然非深於此道
體察有得不足以語此書將成適異軒來津爲吾弟友梅診治舊疾見其醫學
之精取效之速因與縱談防疫經過情形知異軒有是書之作也不禁欣喜感
慨援筆而爲之序後之人幸勿取人之所短而棄己之所長也可

中華民國七年戊午夏五月東海徐世昌菊人氏序

傳染病八種證治晰疑序

余以國家多故投筆從戎轉展萬里以至於今衰鬢毛耗精血每思息肩於泉石致志於黃老而未遑今歲復奔命於湘鄂之間櫛風沐雨披星戴月苦其心志勞其筋骨數月以來遂攫危疾羣醫束手勢將殆矣徐東海余師也聞而憫之以余屬名醫曹巽軒一劑而沈疴立起二三日而爽然若失余驚其技之神亟叩其所學始知曹子之醫盡得岐軒之術所謂參天地配陰陽位中和育萬物道精理密神出化入雖以之治天下而有餘豈獨醫而已哉曹子將歸出所輯傳染病八種證治晰疑十卷以示余屬爲序余見東海師之序是書已吐其葩而褒其實曹子焉用余不文之言爲哉然余思曹子治余疾之神余信其人矣曹子所輯諸子之書其學問必爲曹子所深許而相等者則余又因信曹子而兼信其友及其書矣則余雖不文亦不能已於言請卽書此以爲序時

中華民國七年戊午夏五月析津曹錕仲珊甫識

Faint, illegible text within a rectangular border, possibly bleed-through from the reverse side of the page.

傳染病八種證治晰疑序

凡物之類有以愛護逾恆而死者有以斲傷過度而死者愛護也斲傷也過不及雖相懸甚俾失其自然之性而夭則一也惟人亦然夫富貴之家膏粱文繡羅列下陳養尊處優氣指頤使似宜無病矣而不能也既病矣醫者踵相接於戶此曰虛宜補彼曰實宜瀉藥餌雜進但延中醫而又恐求治之道未盡也更延西醫西醫之言又不同也一誤再誤以至於死則曰此病當死而不悟求治之龐雜以至於死也此愛護逾恆之害也貧苦之家飢寒勞瘁日出而日入而入固不知有病也然飢飽不時寒暖不均卽有疾疢亦不遑治迨病革而治已不及矣此斲傷過度之害也然此特言其常也言其變則不然當晉綏時疫浸盛之際大總統任朝宗爲防疫會會長一再親履疫地調查情形大抵貧而染疫者多富而染疫者少夫疫由雜氣中人故蔓衍皆是富者大廈廣院深居簡出飲食寒燠皆能得宜故感觸者少貧者飢寒驅迫奔走衣食所不能已故感觸者多竊常憫之於是與我國及東西有名之醫研究防治之法以拯斯

民於疾苦之中惟東西醫以其國之所學施於我國防法固善治法則未暇也我國之醫時則有曹元森與其同志楊德九陳舒陳世珍諸子赴疫地參與治療歸語余以疫之原因及治法余不禁忻然曰諸君皆名下士也曷各出其卓學傑識著成不易之書以爲後來防治準繩乎曹子謙不敢固要之乃更益以孔繁棣張漢卿二子之作爲傳染病八種證治晰疑十卷以示余余於醫道雖不明讀其書而能瞭然於心目間則知醫者讀之當更有味乎此書矣急以梓行於世爲納民於壽域之左券云民國七年五月江朝宗序

傳染病八種證治晰疑序

六氣之外有雜氣自病之外有傳染人生於天地之間自不能無感觸而爲病矣既有感觸而爲病則可感觸者隨地隨時皆有惟賴醫者消息施治之故中國自軒岐以迄於今病情萬變治病者亦隨機立應於六淫之邪固無不治之證如傷寒發斑天花白喉各有專門名家之書霍亂痢疾辨論證治亦詳著簡編猩紅熱鼠疫之類前雖無專著之書而散見於各家記載者其證治經驗亦復不少中國之於八種精於醫理者皆以爲有恃而無恐者也惟日歐各國最畏此八種謂之急性傳染病不及治亦不能治凡遇此證惟聽其死或速其死以爲消弭之計而已中國人士熟不加察凡外人之所畏者亦畏之外人之認爲不治者亦不治之而內務部卽以日本法律所指定之百斯篤虎列拉腸窒扶斯發疹窒扶斯猩紅熱赤痢天然痘實夫的里八種之傳染病列爲防疫之必要俾有病此八種之一者生則隔離死則消毒以免傳染其用心固可謂愛民而其實則不啻害民也何則所謂八種傳染病於今除傷寒白喉猩紅熱天

然痘尙不常見外如溫熱發疹霍亂痢疾等時令病幾無時無地無之中醫之治愈者一歲中亦不知凡幾苟以規定之條文待之則惟有待死之期而無求生之路矣殊不知中西醫學術各有短長何可盡棄其學而學如陳相之於許行哉況中國未有西醫之時病者不加多西醫既入中國之後病者不見少乃驚新炫異棄實尙虛中國前經兩次防疫公私耗損不下數千萬謂之有益耶殊不足以厭人心謂之無益耶在事者心有未甘今晉綏之役防疫會長江宇澄將軍與中西醫士研究防治之法不遺餘力西醫執有防無治之議中醫則以爲有一病必有一治法歷舉原因病狀方藥以爲言將軍既嘉西醫防術之美備復亟稱中醫治理之優長爰命撰述成編公之於世以期中西各醫士敦學相長庶幾佗日防治並行登民壽域元森不揣譎陋遂與諸同志詳加研討將所謂急性傳染病八種分晰言之名曰傳染病八種證治晰疑云時

民國七年五月吳縣曹元森序於京師

傳染病八種證治晰疑編輯例言

民國六年之秒晉綏閩傳溫役大有一日千里之勢中外設防公私交瘁內務部規定傳染病八種於防疫範圍之內以日人法律指定八種爲急性傳染之故也八種傳染病之譯名曰腸窒扶斯發疹窒扶斯天然痘赤痢霍亂百斯篤實夫的里虎列拉也惟日歐諸國但知傳染之速而不知病證之緣由多方研究剖驗亦僅能言病菌之形象而不能得病源之證治故列此八種之名以爲有防無治而已然在彼國人人之心理如是固無不可在我國人人之心理尙以爲有治亦欲強而盲從爲不治則不可况此次防疫檢驗病狀是非淆惑莫衷一是中醫雖極欲貢其學說以爲防疫之助而未能也今防疫已終防疫會長屬爲撰述疫病證治之法以爲成績不佞中醫也證治中醫所宜言也因思凡爲醫者開宗明義當先明病故爲論病篇病情既詳治理宜抉作論治篇治法之用惟藥是賴作論藥篇三篇既作次論八種鼠疫疫中之險惡者今人實蒙其害畏之如虎者也作溫疫證治第一猩紅熱亦溫毒中之險惡者也發於

營過於衛進出不得瞽悶而死作猩紅熱證治第二傷寒古之劇證也治不得法往往卽死作傷寒證治第三發斑發疹肺胃重證虛實皆有邪已化溫作斑疹證治第四白喉溫毒勢如破竹腫滿閉塞危在旦夕作白喉證治第五天然痘與溫痘異辨之宜慎庶不誤謬作天然痘證治第六霍亂有寒有熱有乾有濕轉筋最險須臾命絕作霍亂證治第七赤痢最多腸胃積熱凝結如膠勢欲下而不得作赤痢證治第八入者之外略而不舉以合乎規定條例末復附以溫役應用藥目註釋凡以備會長之採擇且以供中外好學深思者之研究其得失也若夫矜聰明肆意氣舍學術事夸誕於義無取於人無補所不敢及識者鑒焉曹元森謹識

傳染病八種證治晰疑目錄

例言

卷一

總論

論病篇

論治篇

論藥篇

卷二

溫役證治第一

卷三

猩紅熱證治第二

卷四

傷寒證治第三

卷五

斑疹證治第四

卷六

白喉證治第五

卷七

天然痘證治第六

卷八

霍亂證治第七

卷九

赤痢證治第八

卷十

溫役應用藥目註釋

傳染病八種證治晰疑卷之一

吳縣曹元森異軒甫纂定

吳縣陳舒企董甫述

總論一

論病篇

天地者氣化也輕清上浮之氣謂之天重濁下凝之氣謂之地氣化從無形而成有形所謂無極生太極也從無形而成有形斯有病矣清不升濁不降早潦不時寒燠失度莫非病也人受天地之中以生亦從無形而成有形有形亦斯有病矣五行六氣感於外七情六欲傷於內莫不病也然天地無私氣化渾融偶失其序而無損人生不免情欲之累復感氣化之異其爲病也由淺入深皆足以戕其生而成不治之候不獨傳染之八種傷生之速爲可畏也故攝生者卻病之良方極欲者致病之媒介及染病而畏之不如未病而慎之則雖急性傳染如日歐諸國之所謂不治者未嘗不可免也然以此語賢智者則有餘以語愚昧者則不足蓋其智識淺陋狃於聞見而不辨是非此所以此八者

之病在愚昧者傷生最多爲可歎也然醫者於此八種在中國研究病情專以氣化爲主日歐則專以格致爲主有知微知顯之判也今姑以中醫研究此八種之病情言之夫病之傷生最速者惟極熱亡陰極寒亡陽二者而已然極寒亡陽者至少而極熱亡陰者至多也以鼠疫言頭痛身痛四肢痠痺疔瘡斑疹衄嗽咯吐煩躁懊懣昏譫狂越痞滿腹痛熱結旁流舌焦起刺鼻黑如煤目赤耳聾骨痠足腫舌唇乾裂體脈兩厥種種見於外應於內皆熱極之候也以猩紅熱言徧體猩紅發於內外肌裏非斑非疹皆昏亂瞽悶邪熱發於陰分其他危候與鼠疫略似以傷寒言在昔爲時令之劇證然內難諸經或稱傷寒亦曰溫病或以溫病概諸傷寒其言似不甚合在善讀經者言之則自可索其隱也傷寒雖初感風寒而病數日不解則化溫矣此以傷寒而謂溫病之由也然正傷寒在冬藏之令若春夏秋三時則是溫病矣蓋溫病亦由外感六氣而發故前人亦稱之爲傷寒謂類於傷寒也以發疹言之傷寒而發疹卽與溫病同以四時之溫病例之失下者邪鬱旣久必奪路而出傷寒之發疹亦由是也以白

喉言之白喉者肺胃蘊熱積久上凌咽喉頃刻腫滿白腐苟少延誤卽成壞證而惡寒發熱各證亦兼有之與溫病無異也以天然痘言之痘之證候不一熱毒盛者陰液必虧乾癢黑腐煩躁狂熱神昏譫語此皆熱候也虛寒者身不大熱四肢皆冷吐瀉乳食痘發不續慘淡無形喘促緊悶此虛寒候也今牛痘盛行天然痘不多見而四時之溫痘則常有之其見證與天然痘異蓋純係溫邪也以霍亂言之霍亂一證大都內傷飲食外感六淫邪食相搏清濁不分或吐或瀉或吐瀉交作或不吐不瀉或轉筋入腹四時皆有之以赤痢言之赤痢不外濕熱積滯欲下不得視白痢噤口痢休息痢等尙爲最輕之證也總此八者日歐各國謂之急性傳染然能受傳染者必其人先有伏病而未發感受病者之穢氣如導火之線一觸卽發耳若養生有素者其肌膚愉快腠理縝密氣血榮和臟腑清潔雖有雜氣不易感受卽呼吸之間偶觸氣穢內養旣足無隙可乘如宋文信國在獄時囚皆傳染疫病信國獨不及是明徵也其他染役之輩所謂物必自腐而後蟲生之內經上古天真論云虛邪賊風避之有時恬澹虛

無精氣從之精神內守病安從來人能以有形之軀蠲其情欲養之歸於無形何病之有何傳染病之有

總論二

論治篇

人以醫比相言其治治我以醫比將言其治亂治治以寬大之政參贊造化位育中和變理陰陽協於四時俾成長治久安之世此誠有道之言也然治與亂每相尋德與威須並用譬如堯舜之世而有四凶成康之世而有管蔡當其時惟有威武足以治亂始得轉危爲安苟仍以寬大姑息養癰成患必致不可救藥人之有病也亦然或外感或內傷必先去其病病去而人可安若執治未病之法以治有病之人亦苟延殘喘而已夫病者猶暴徒也其犯之也乘隙蹈瑕或實或虛或明寇或暗襲或爲手足之憂或爲腹心之患變幻譎詭殊難捉摸醫者視之或奪其內或攻其外或犯其實或避其虛或聲東擊西而以智取或再接再厲而以力勝威以劫之惠以柔之除暴安良與將之知己知彼運籌帷

幄決勝千里同故我以之比將然今中國之醫良者少矣非誅伐無過卽縱容
養患於是日歐之醫學得悅於中國人之心其治法旣簡易易從其飲食又恣
啖不禁遂益敝屣中醫矣殊不知中醫之學肇於岐黃本諸氣化陰陽表裏寒
熱虛實從逆奇偶升降生剋取象三才消息四時經權達變分條晰縷立法之
精微用法之活潑誠有天地造化之妙而今之讀書者不通今操術者不法古
每遇時雜各證言人人殊反啟人疑宜乎中醫之學浸失浸遠每况愈下皆粗
工之罪也以八種之傳染病而言證狀危險固可驚畏然猶易於勞傷雜證也
蓋勞傷雜證滋蔓難圖時行之證治之合法其進雖銳其退亦速况急性流行
之傳染病莫非天地人之雜氣相感而成其病皆從燥化燥火之氣助陽爍陰
陰津易竭竭則雖壯者亦不免於危亡故中醫之治用釜底抽薪之法十治七
入夫釜底抽薪則火息熱退水無乾涸之虞若揚湯止沸而火不息水火相爭
曠日持久水不勝火而亦竭則終於不治而已再言氣化之理設如咳嗽吐血
咽喉腫痛人以爲肺病也而不知胃家停積化熱大腸結而不通熱蒸於上亦

能咳嗽吐血咽喉腫痛治肺必應清胃而效立見矣又如發熱頭痛身痛人必以爲風也而不知溫邪內蒸氣逆血熱亦能發熱頭痛身痛治風則愈益其病清溫則病若失矣此無異用兵之隨機應變使彼無遁情而奇功獨奏者也於此而三復也思過半矣

總論三

論藥篇

人受天地之中以生得天地之正氣者也動物得天地之雜氣植物得天地之偏氣而生者也惟動植各物不識不知能順天地之性故雖偏雜而無傷人則稟賦不一或傷於風寒燥濕暑熱或傷於飲食或傷於情欲其正遂不能無偏雜於是聖者察天地造化之功以動植物之偏雜治人之偏雜俾還復其正氣神農本草經詳其氣味色性輕重宜忌使後人有所遵循所謂大匠與人以規矩者也然大匠能與人規矩不能使人巧巧者固在人慎思明辨而得之者也乃今之醫者於藥物之學皆不深省藥物之學不深省卽能認證清主治明而

無節制之師以與病戰亦終歸於敗衄而已夫病之中人也有上有下有內有外有急有緩有實有虛藥之治病也對證則病受之而病除不對證則病不受而人身之偏者益偏勝者益勝馴至於成癆瘵或天札可不慎哉外感之六氣與人身相合故病必有兼證而藥之治病在制其所勝譬如風一也兼證有濕有溫有寒風勝則治風爲主濕寒溫兼證勝則從兼證爲治此其例也天地之六氣中人而爲病卽以動植物各稟之氣以爲藥寒者熱之熱者寒之燥者潤之濕者燥之故治風溫宜辛涼辛寒風濕宜辛散風寒宜辛溫燥寒宜辛散燥熱宜辛苦甘寒濕寒宜溫燥濕熱宜淡滲暑涼宜辛溫暑熱宜辛涼暑濕宜苦寒兼淡滲此對證用藥之大概也至於治溫之藥專以辛涼辛寒苦寒甘寒鹹寒之味爲主溫燥升散酸澀之味皆在所禁用乃有明知其風溫而升散之明知其濕溫而溫燥之明知其熱利而補澀之明知其熱結而燥化之誅伐無過助惡爲虐灼人陰液致於危亡雖大聲疾呼而置若罔聞豈其好草菅人命耶蓋於藥物之學未能研究而又自是其是之故也夫以溫病見證之明瞭者用

藥尙有如此之謬誤其於雜證之頭緒紛繁者其失當更不免矣然老病雜病用藥偶誤不致有性命之憂溫病則用藥一誤危機立兆爲醫者可不致意於藥物之學乎

卷之一終

傳染病八種證治晰疑卷之二

吳縣曹元森異軒甫纂定

溫役證治第一

自晉綏鼠役盛行之時言治役者實繁有徒大旨皆宗鼠役抉微一書而來其他或採前人治溫之方終有純駁不一之憾是篇爲外城官醫院醫官楊德九陳世珍陳舒張漢卿孔繁棣諸君出其學術經驗共相討論而成精神活潑非同時言治役者所可等論警察總監吳炳湘深爲嘉許附刻於抉微之後惟未列方讀者尙以爲憾今采其論證論治之文略加修正並將在大同治役經驗之方及加減法附後以備參考

鼠疫之名稱曰百斯篤又名黑死病又名黑眼疫又名黑溫疫

按鼠疫既有黑眼疫黑溫疫之名其爲溫疫中之一種疫病明矣

鼠疫之原因由直接排泄物分泌物唾滴物或鼠族昆蟲等傳染自皮膚或自呼吸器

按是疫之原因所生大抵由空氣中含有一種異氣亦曰雜氣或人物中排泄一種不潔之氣吸受而入遂成是疫西醫所論此疫本非專指於鼠不過以鼠之爲物晝伏夜出缺見日光潛居陰穢之地易染疫氣穴垣穿屋日歷多家較之他物易於傳播耳方今戰事幾徧全球國內用兵亦經多時馬革裹尸血流成渠加之去秋大水爲災入冬地氣閉塞一旦初陽上升乖戾不正之氣隨在皆可感觸苟衛生不能表裏兼至卽無傳染之影響亦恐不免執此以觀則今流行時疫又豈僅鼠疫之爲患使然耶

潛伏日期二日至七日

按人之秉賦不同虛實各異其人實者則發病遲其人虛者則發病速內經曰冬不藏精春必病溫藏於精者春不病溫虛實之不同於此可見

症候惡寒或戰慄頭痛眩暈煩渴倦怠惡心嘔吐顏面蒸紅眼球結膜而充血皮膚灼熱舌被厚苔因精神之發揚致有暴躁譫語間代性痙攣終乃心臟麻痺及虛脫之病遂至於死

按凡見以上所云現症或見表病或表裏三焦俱病中醫方書論之最爲確切夫人之初受疫病由呼吸而入於肺胃醞釀抑鬱升騰莫制遂發頭痛惡寒嘔吐惡心諸現象失治則邪氣愈熾彌漫三焦充塞表裏又有煩渴面紅目赤苔厚諸下症至於痙攣譫語等狀或爲燥屎譫語或係溫病中之兩厥陰同病最爲危候其虛脫一語殊難附會蓋熱病最易傷陰前人言之已詳故謂之陰脫則可謂之虛脫實非確當且病之表裏不清三焦層次不明何足與言治疫哉

百斯篤之癰疽

按溫疫之瘍癰卽係溫毒入於血分中醫方書謂之發頤蝦蟆溫疔疽溫等本屬常有之病不足爲怪但疽之一字則名稱大誤矣何者陽爲癰而陰爲疽是症旣純屬陽毒焉有成疽之理症狀不同治法迥異豈可以陰陽不分癰疽並列混舍而語哉

百斯篤之肺炎惡寒戰慄熱候在四十度四十一度爲弛張性咯痰爲血狀含

有百斯篤菌頭痛嘔吐意識清爽時或譫妄筋惕肉瞤呼吸催促而困難胸痛咳嗽作捻髮音不明之氣管枝呼吸音及濁音聲音震盪強盛脾臟重大

按肺爲華蓋在各臟腑之上此症臟腑均已燔灼上蒸於肺化源閉塞清不升濁不降故有痰血呼吸催促等狀至所述譫妄肉瞤乃係兩厥陰病象而獨以肺炎名之似覺未盡妥善蓋不知肺爲受病之處而非發病之源也脈搏頻數脈達一百及至一百二十

按中西醫診脈雖各不同然西醫謂之數中醫亦謂之數其理既同其爲大熱之症可知

療治患者之隔離病室之清潔衣服及用具之消毒其用藥爲東醫某氏之血清興奮劑酒精劑強心劑等並飲勃蘭地酒赤酒牛乳雞卵肉汁等類

按病室之清潔固屬當然至於隔離則病之輕者知爲死症而憂慮愁煩必至加重其重者則動作須人若無人看護且置之僻遠之地人無生趣是不啻促之使死也至所用藥血清以清血則可然尙不知此藥爲何姓名尙不

差若酒精等則以熱治熱而又益以勃蘭地酒雞卵肉汁等物猶之火上澆油尤爲此病所不宜故謂非病之不中治乃治之不中病所以愈治而愈不治也

鼠疫之證既論之於前矣然欲治其病必立其法欲立其法必認其證證若不
明何足言治茲將考之於古驗之於今者辨其名詳其因認其證察其象立其
法而救療焉

一曰辨名

古書所載只名曰溫役張子培解溫字爲熱的當無疑楊栗山謂役者溫病傳染如人之行役也後人溫字省彡加疒爲瘟役字省彡加疒爲疫古文並無是二字也且溫之爲病古人罕有發明之者非闕也卽以漢時論之地廣人稀空氣清潔而不雜是以病多傷寒雖仲師之聖亦以救時爲要務溫之一病未嘗多見故不暇窮其源或謂後世失其傳然不可考矣劉河間始稍稍發明之然亦非全璧近世張子培王潛齋雖詳論之仍多未當吳又可著溫役論以溫病

本於雜氣非風寒暑濕燥火六氣之病澈底澄清爲醫界放大光明惜乎泥於邪在膜原半表半裏而創爲表證九傳之說前後不符未免白圭之玷楊栗山宗之著寒濕條辨取瑜棄瑕獨具卓見悉將依違兩可之論一掃而空立方藥以濟眾其有功於後世豈淺鮮哉且自謂歷驗三十餘年傷寒僅四人濕病不勝指屈栗山時當清初其言如此今之地猶昔之地也人數則幾倍之干戈幾遍全球暴尸流血民多夭折物多疵癘加之旱潦失常其爲雜氣流行天地之間鍾於人者卽濕也若推而言之雖雞豬牛馬所鍾者其傳染與人無異鼠役之生非必自鼠其傳染於人亦不獨爲鼠其病狀又皆同於濕同人等歷驗其治法亦如濕由是觀之卽濕疫之一種則實名之濕役而已

二曰詳因

夫濕病旣知爲雜氣而非風寒暑濕燥火六氣所生矣其因不已明乎試更詳論之若栗山云六氣之病四時錯行之氣也皆自氣分而傳入血分濕病得天地之雜氣邪毒內入由血分而發出於氣分一彼一此已昭然若揭至內經謂

冬傷於寒春必病溫又云冬不藏精春必溫病其意深切後之學者當體會此意於傷陰二字大爲注意熱本傷陰陰足者尙可支持以待救治陰虧者一遇此證爲熱蒸燂陰液既竭未有不死者故治法不能不用涼下者爲保存陰分作釜底抽薪之策也

三曰審脈

凡溫病脈見洪長滑數者輕重則脈沉甚則閉塞

凡溫病脈見洪長滑數兼緩者易治兼絃者難治

凡溫病脈沉濇小急四肢厥逆通身如冰者危

凡溫病脈兩手閉絕或一手閉絕者危

凡溫病脈沉濇而微狀若屋漏者死

凡溫病脈浮大而散狀若釜沸者死

按溫疫大致雖同必切脈辨證互參虛實以施治有脈與證相應者則易於識別若脈與證不相應切宜審察緩急或該從病或該從脈以定從違夫脈原不

可一途而取須以神氣形色聲音證候彼此相參權衡安危方爲盡善所以古人望聞問切四者不可缺一以上皆楊栗山先生寒溫條辨論證論脈最爲精確之言與現在我輩所見之脈往往相同故僅述之而不別作論說焉

四曰審證及察象

凡溫病有陽證而無陰證此昔賢所共認而非余等之私言亦醫家所共知者如發熱惡寒頭痛目痛身痛鼻乾不眠脅痛寒熱而嘔潮熱譫語詈罵不認親疏面紅唇燥舌黃胸腹滿痛能飲冷水身輕易動常欲開目見人喜言語聲響亮口鼻之氣往來自如小便或黃或溷濁或短數大便或燥秘或膠閉或挾熱下利或熱結旁流手足自溫煖爪甲自紅活此陽證之大略醫者不難辨認至於陽證似陰乃火極似水真陽證也蓋傷寒溫病熱極失於汗下陽氣亢閉鬱於內反見勝已之化於外故凡陽厥輕則手足逆冷涼過肘膝劇則通身冰冷如石血凝青紫成片脈沉伏濇甚則閉絕以上脈證悉見純陰猶以爲陽證何也及察內證氣噴如火譫語煩渴咽乾唇裂舌苔黃黑或生芒刺心腹作痛大

便燥結或膠閉或挾熱下利或熱結旁流或下血如豚肝再審其屁極臭者是也粗工不察但見表證脈體純陰便投溫補禍不旋踵大抵陽證似陰卽假陰也此與楊盛格陰例同王太僕所謂身寒厥冷其脈滑數按之鼓擊指下非寒也竊謂溫病火閉而伏多見脈沉欲絕不盡滑數鼓擊要在審證察象則無遁情楊栗山辨之詞簡理明醫家當奉之爲指南者也

五曰治法

蓋溫病得天地之雜氣由口鼻吸入直行中道流佈三焦散漫不收去而復合病入血分故鬱而暴發亦有因外感或饑飽勞碌或焦思氣惱觸動而發者一發則邪氣充斥奔迫下行極而上上行極而下卽脈閉體厥從無陰證皆毒火也治法急以逐穢爲第一務上焦如霧清而化之兼以逐穢中焦如漚涼而下之兼以解毒下焦如瀆決而逐之兼以養陰惡穢旣通乘勢追拔勿使潛滋所以溫病非瀉卽清非清卽瀉原無多方時其輕重緩急而救之或該從證或該從脈且勿造次則治溫之能事畢矣

溫役之經驗方

連 喬 三錢至五錢

銀 花 三錢至五錢

知 母 三錢至五錢

炒 梔 子 三錢至六錢

黃 芩 三錢至五錢

黃 連 二錢或三四錢

大 青 葉 三錢至六錢

丹 皮 二錢至四錢

薄 荷 一錢至二錢

川 貝 母 三錢至五錢

生 石 膏 五錢重可加至三四兩

元 參 四錢至三四兩

竹 葉 四錢

菊 花 三錢

霜 桑 葉 三錢

生 軍 二錢至三四錢

加法

胸痞加漉瓜萸五錢至一兩

口渴加生石膏 元參一兩至三四兩

目赤加龍胆草 青黛三錢至五錢

舌苔黃白或膩白大便結者加生軍四五錢

大便不通或挾熱下利或大便濃血或熱結旁流加元明粉或芒硝二錢至四

五錢

瀉黃短者加車前子三錢至五錢

濁赤或不通者加滑石三錢至五六錢

身有疙疸項腫爲發頤面腫爲大頭瘟加青黛三錢至五錢 蒲公英五錢至

一兩

譫語加羚羊角或犀角一錢至二三錢或紫雪丹一錢至二三錢

神呆神昏則熱入心包加安宮牛黃丸一粒至二粒

若舌卷囊縮手足癱瘓病已危篤法所不治間亦有得愈者則非大劑一日服三劑不可略一遲疑則無及矣此皆素日經驗得來觀者幸勿訝其藥劑之太涼太重而延誤則病人之幸也

卷之二終

傳染病八種證治晰疑卷之三

吳縣曹元森異軒甫纂定

浙紹陳世珍伯雅甫述

猩紅熱證治第二

中國原無此病名丁氏福葆醫學叢書謂卽是疹子前因未見此證遂亦信以爲溫疹或西醫名稱如此或東醫名稱如此彼既註爲疹則按疹治之不必強爲分辨也所可異者丁氏書中謂此證應見發熱惡寒咽喉疼痛精神溷濁譫語嘔吐熱度甚高舌赤有苔頸胸背部生深紅色之疹漸及全身三日乃至八日而消退退則皮膚剝脫盡屢屢繼續而發腎炎且有至危險者等語又謂與此證相似者爲麻疹風疹腐敗性發疹藥用發疹丹毒等原文所述各病與溫病中痧疹大致相同必至繼續而發腎炎然後危險而近日之西醫則謂此病爲大危險能治愈者甚少近數年來常遇此病始知丁氏之言認證尙未的確且恐當時認爲猩紅熱者非真猩紅熱也實溫疹中之熱輕者誤爲猩紅熱耳

西醫所定病名其以西字譯成中國字音者係屬還音本無義意姑不具論惟
猩紅熱一證則其病名實爲中國字且深有意義未得其真病遂以疹子當之
而不知實與疹子大有分別也夫猩之爲物我輩雖未嘗見然與猿猴同類其
皮膚諒亦相若猩紅熱一病皮膚與猿猴之臉紅頗同且週身一色並無顆粒
可分非如疹子之顆粒雖紅而無顆粒之處尙有皮膚不紅之地也民國三四
年間曾充防役之差臨證旣多童男女之出疹者實居大半但此等真猩紅熱
證不過十餘人曾記童男女患此證者十人皆治痊無一死者雖熱度極高而
陰分未傷用大涼大下養陰之藥五六劑卽愈又一四十餘歲者陰分不虛且
兼喉痛爲治亦愈惟一陳姓男子年在二十歲以上一蔣姓婦人亦年在二十
以上此兩人者病發卽見釜沸脈陰分將竭知其必死勉用養陰涼下之劑如
石投水一當日卽死一次日死蓋平日陰分素傷一遇此病立卽燂盡草根樹
皮究不能驟生真陰雖服藥亦難挽救也至所見各證如頭暈身熱面赤舌黃
身瘦口渴喜涼不食大小便不利或不通重則譫妄甚則神昏睡不能醒是爲

熱入心包再重則手足痲痺已作內抽而病危矣治法不外清其血分之熱而下其腸胃之毒與溫病之癍痧痘疹相同但熱較癍痧痘疹爲尤重輕微之劑不能勝任必用大劑涼下方能奏功其重要處即在傷陰二字童男女陰分未傷惟肌膚不如成人之密固故一遇溫熱略用表藥或應下不下其熱無路可出竄入經絡卽見癍痧痘疹等證良由庸醫無知沿用舊法以表爲主愈表愈出有出至四五次者而真陰爲表藥所傷則險證百出而病不可爲不知傷寒中之癍疹宜用表藥表出卽愈今無正傷寒時證皆係溫熱最忌發表如童男女之未傷陰者表藥猶能燦涸其陰以喪命况成人之已傷陰者發表焉得不死哉治此等病者應知熱本傷陰發表則更傷陰惟急下始能存陰則溫病中之各證皆能了解不獨猩紅熱一證爲然也

治猩紅熱方列後

與溫病中癍痧痘疹藥同但熱甚重藥劑宜大

大生地

五錢至四兩

元參

五錢至四兩

青黛

三錢至五錢

龍膽草

三錢或四錢

生石膏

五錢至四兩
搗碎

黃連

二錢至三錢

黃芩

三四錢

炒梔子

三錢至五錢

知母 三錢至八錢
銀花 三錢至四錢
連翹 三四錢
生軍 三錢至五錢

川貝母 三五錢
竹捲心 三錢
萹仁 五六錢
車前子 三錢
包

外加安宮黃牛丸 每劑一粒或二粒必不可少

頭痛加薄荷 一二錢
胸痞加瓜蒌 五六錢
項腫加蒲公英 五六錢

口渴加花粉 四五錢
溺短赤加滑石 四五錢
腿痛加炒桑枝 一兩

挾熱下利熱結旁流加元明粉 二三錢
譫語大熱不退加羚羊角 一錢

若手足痲癢舌捲囊縮或神呆神昏沈睡不醒病已危篤 治法見卷二與治溫役同

病時只准食稀粥半盞日二三次或食橘梨橙柑之成熟不酸者其餘飯麪油膩各肉魚蝦牛乳餅乾油果等物皆不准食食則病重病愈十日內僅能吃稀粥漸至稠粥半月後略食爛飯半碗一日三次一月後始准飲食如常否則食復並有怒復勞復房勞復各種皆甚危險者也

傳染病八種證治晰疑卷之四

吳縣曹元森異軒甫纂定

淮安楊德九浩如甫述

傷寒證治第三

風寒暑濕燥熱六淫之邪何以獨重於傷寒非因內經傷寒有傳經兩感其死皆以六七日間之文其所感有獨異其致死有獨速之故乎然內經之論病也論治也不過各舉其要以作則於後人非獨於傷寒有鄭重言之之意也故歧伯之論治但曰未滿三日者可汗已滿三日者可泄而已迨仲景之世傷寒盛行其宗族死於是病者甚多仲景於是痛治法之不備傷橫天之莫救乃尋求古訓博采羣方著成一家言垂爲萬世法而傷寒一證參綜變化於以大明厥功偉矣第漢人之書文法深奧且遭散逸晉王叔和搜集其文而編次之已失其舊矣於是後之讀是書者各生議論互相訾議無異治經之生爭辨今古文而於本意反多隔癘也夫傷寒外感之邪苟無誤於汗下則無壞證而病者

亦無必死之理仲景之著此書立一百十三方其正方不過汗吐下三者而已其他皆爲救誤治成壞證而立方也學者遂以一部傷寒論千頭萬緒而謂爲難讀之書致失仲景啟人自悟之心可不惜哉非獨此也且有執內經熱病者皆傷寒之類也難經傷寒有五有中風有傷寒有濕溫有熱病有溫病之文遂以各證與傷寒混而爲一凡遇四時之暑溫濕熱必曰此傷寒也而治之之法亦如治傷寒而毫無判別其害人也豈淺鮮哉夫中風之脈陽浮而滑陰濡而弱濕溫之脈陽濡而弱陰小而急傷寒之脈陰陽俱盛而緊瀉熱病之脈陰陽俱浮浮之而滑沈之散瀉溫病之脈行在諸經不知何經之動也經言脈象旣判別如此之明而治法豈可無別或曰善讀傷寒金匱二書則無病不可治此誠有得之言蓋卽岳武穆用兵運用存乎一心之意也若死於句下者雖讀二書爛熟於胸中臨診未有不僨事者蓋動輒以太陽傳陽明陽明傳少陽少陽傳太陰太陰傳少陰少陰傳厥陰之死法而不知有傳有不傳有直中有兩感有合病有併病之異也考陶節庵論傷寒傳足不傳手經一篇論經絡藏府寒

熱表裏病證治法最爲明晰徐氏稱之此與傷寒論可謂之先河後海也惟傷寒一證在古時爲多今則尠矣蓋古今氣運有轉移之異人口有眾寡之異以今之人煙稠密雜氣爲多陰寒之象自不易見徐氏評葉天士指南一書謂獨少傷寒余謂非此書獨少也傷寒雖有而不多見治傷寒者又不屬一人固不能爲葉氏書疵也若今之粗工動輒曰傷寒而誤人真有天淵之別矣嗟乎中國之醫尙不能讀先賢之書而分別六淫之所感何況於東西醫哉丁氏福葆譯東醫之傷寒傳染病所舉第一週至第五週脈象證候及合病等中風傷寒傳經入藏不能辨別實是醫學之駢拇枝指而已惟近來中國醫學愈晦學者咸慕東西醫之易爲而又爲投時之利器自誤誤人皆所不恤故不揣謏陋卽其書所述之證候脈象合併病等加以辨註而繫以陳修園之傷寒串解俾仲景六經正變各病治法易於推求而中西醫理之精粗亦不待言而若揭矣

丁氏傷寒證候合併病譯文辨註

證候

前驅期食氣不振全身倦怠頭痛不眠筋肉疼痛就業厭怠

按此卽太陽證初起身痛腰痛骨節疼痛之候也

第一週頭痛惡寒發熱爲階段狀舌被厚苔食思缺損薦骨痛不眠便秘

按此卽太陽證頭痛項強惡寒發熱之候也此云階段狀喻發熱由漸而盛也薦骨痛卽項強也舌被厚苔食思缺損卽心下痞按之鞭之候也不眠發熱甚也

終則脾藏腫大發淡紅色圓形之薺薇疹下利稀薄迴盲音尿量減少

按脾臟腫大下利稀薄迴盲音卽太陽證汗出解之後胃中不和心下痞硬脅下有水氣腹中雷鳴下利也尿量減少併入陽明腑也發淡紅色圓形之薺薇疹則又屬太陰中風證矣風賊脾元邪鬱肌腠而發疹子高出皮膚頭元光滑者是也 又按傷寒發斑發疹卽爲冬溫溫邪鬱於陽明發而爲斑溫邪鬱於太陰發而爲疹胃主肉脾主肌故也不可不察彼氏之書於此固無別也

第二週發稽留性熱比較的脈搏遲緩且爲重搏性脾腫鼓脹下痢發薔薇疹兩耳重聽意識昏懵時發譫語有時臄跳動或呈撮空摸床等狀現窒扶斯顏貌或發陽狀態關於外界之事物無不安靜但時獨語舌乾燥而震顫被煤灰色之苔蛋白尿

按此節所列一週中之證候極重惟中風也傷寒也溫也則混爲一氣毫無區別惟有脈搏遲緩一句尙可知其謂傷寒耳以言傷寒則此節之證候殆六經之病畢見矣如稽留熱則太陽表證尙未除也脈遲爲寒而緩則爲風也重搏性則又爲沈緊之象也脾重鼓脹下痢發薔薇疹陽明太陰證也兩耳重聽意識昏懵少陽中風證也時發譫語捉空摸床陽明證也或發揚狀態厥陰證也關係於外界之事物無不安靜但時獨語舌乾燥而震顫被煤灰色之苔蛋白尿少陰證也夫以傷寒之重候既不詳脈亦不辨經龐雜言之又何補也

第三週發弛張性熱脾藏腫大薔薇疹消退現結晶之粟粒疹舌苔脫落而呈

紅色

按此言弛張性熱言熱盛逾於常則仍有表證也脾藏腫大卽腹大實痛裏證也結晶性之粟粒疹卽水疹太陰氣不化濕也舌苔脫落而呈紅色則又爲邪熱深入也此節所列各證似言較第二週爲輕減而仍有表有裏有濕有熱不知其謂傷寒也謂溫病也不倫不類至於此極矣

第四週初爲弛張性熱後遂平溫食慾增進衰弱脾腫縮小鼓脹下痢粟粒等證同時消退尿量增加

按此節言第四週諸證皆已也

第五週體溫如常以下食氣暴進

按此言第五週病退而思食也

合併病

爲氣管支炎就下性及纖維性肺炎

按此卽作咳也太陽中風有之

喉頭潰瘍

按此卽少陰病嘔而咽中傷生瘡也

聲門水腫

按此卽心下有水氣也

鼻加答兒

按此卽傷風鼻不通氣也

衄血

按此卽陽明病口燥飲水不欲咽而衄血也

心囊炎

按此卽熱入心胞絡也

心內膜炎

按此卽熱邪入心也

安魏邦

按此卽氣息喘逆也

口渴嘔吐

按此卽少陽中風心煩喜嘔或渴之候也

第二週或第三週則患耳下腺炎及腸出血體溫脈數虛脫證狀

按此卽陽明中風耳前後腫也腸出血風迫陽明府也體溫脈數則傷風化溫之候矣

腸管穿孔而患穿孔性腹膜炎

按此卽陽明腹滿大實痛呼吸氣促也

脾臟破裂

按此卽太陰腹滿也

膀胱炎

按此卽膀胱蓄血也

腎宇炎

按此卽小便尿血也

骨膜炎

按此卽骨蒸也

肺結核

按此卽咽痛也

其後發病爲衰弱的血栓神經衰弱比斯的里精神病等

按此卽熱深厥深不省人事也

總觀丁氏所譯東醫傷寒證候合併病等風寒濕溫不辨表裏虛實相混不
過述其大概而已而醫學綱要又謂流行多在秋期亦因飲食物而傳染大
致與虎列拉同則更背謬丁氏譯此以爲可與仲景傷寒論相提並論而不
知益形東醫學理之粗率而顯仲景書之精到也茲僅就其譯文以傷寒例
辨注之若有以陳修圓之傷寒串解與溫病文並讀之則知傷寒自傷寒溫
病自溫病其治法如風馬牛之不相及可瞭然於心目間願讀丁氏之譯文

者勿爲蔽其聰明也傷寒串解原書具在茲不備錄

此書以判別之難... 傷寒串解... 原書具在... 茲不備錄... 傷寒串解... 原書具在... 茲不備錄... 傷寒串解... 原書具在... 茲不備錄...

傷寒串解

傷寒串解

卷之四終

傳染病八種證治晰疑卷之五

吳縣曹元森異軒甫纂定

淮安張漢卿菊人甫述

斑疹證治第四

中國發疹一證自古有之丁福葆急性傳染病八種中名曰發疹窒扶斯其論曰此病之原因雖尙未詳然其爲觸接傳染病甚明瞭也其狀雖類似腸窒扶斯而因其無腸之症狀與其經過之異得明明區別之此病日本尙未流行不過稍稍發生耳又云其症狀之潛伏期大抵九日乃至十日於發生時有全身倦怠食思缺損頭痛四肢痛等之前馳症狀俄而發寒戰體溫驟昇當發病第一之夕間有已達於四十度以上者第三日乃至第七日則生特異之發疹此疹爲紅斑狀腰部發疼痛而並帶劇烈之頭痛精神恍惚語言糶糊至第二週在輕症則雖體溫下降諸症漸愈然在重病則諸症增劇由是衰弱而至於死按丁氏所述發疹窒扶斯證狀如頭痛寒熱身倦肢痛等證與夫發疹後之

一切見象尙與吾國方書所論大致相同惟云此疹爲紅斑狀則不能判別斑疹異同故亦含混其詞不知斑疹雖屬相類而病源各別斑出於胃而疹出於肺肺胃發源既殊形色迥異實不能並爲一談斑有二類一曰實斑一曰虛斑疹有三類一曰溫疹一曰白疹一曰風疹若斑與疹相較則斑重於疹疹與疹相較則溫疹重於風疹至於白疹則更無足異茲分別辨之如下

(一)斑者觸目卽見不成顆粒其稠如紋錦佈於胸腹者最多重者並衍及四肢蓋因傷寒陽明熱盛及時行溫熱溫毒失清失下邪無宣洩蘊鬱胃腑直逼血分上行極而下行極而上從內入則爲神昏譫語從外越則發斑大抵色紅起潤者爲吉色紫成片者爲重色黑者爲凶色青者爲必死無論其見證爲寒戰壯熱頭痛體瘦神昏譫語概以清血化斑爲主凡一切溫燥升散之品皆所禁忌考仲景金匱面赤斑斑如紋錦卽是此證蓋陽毒發越於外之故也葉天士用化斑湯治發斑證固有見地然尙少行血散瘀之品恐血熱仍不能排泄淨盡且如二便閉塞非通利曷能使熱毒下行夫如是

則愈泄愈良縱有五色下利同時並見亦無妨害余驗治多矣未嘗有一危險但非佐以養陰之品則不能克奏全功

清血化癍湯

生石膏 八錢至三兩 元參 八錢至三兩 丹皮 二錢至五錢 梔子 二錢至三錢

知母 三錢至六錢 銀花 三錢至八錢 赤芍 二錢至四錢 生地 一兩至三兩

連翹 二錢至四錢 竹葉 二錢至三錢 板藍根 五錢至一兩

右藥水煎涼服滓再煎服

加減法

神昏譫語輕用紫雪丹一錢至三錢重用安宮牛黃丸半粒至二粒或用金汁亦可

斑色紫黑者加犀角羚羊一錢至三錢

心煩加鮮竹葉捲心三錢至五錢連心麥冬四錢至八錢

咳嗽胸膈悶加川連一錢至二錢川貝母二錢至四錢萸仁三錢至八錢

胸悶氣不舒展酌加枳實川鬱金

口渴飲涼重用生石膏咽痛重用生地元參丹皮赤芍川連川貝母目赤耳聾加龍膽草二錢至五錢重用生地丹皮

項腫加蒲公英重用板藍根青黛龍膽草

小便短黃或赤色重加竹葉三錢至五錢滑石二錢至三錢重用梔子至五錢舌上苔或黃膩加生軍二錢至五錢如欠津重用生地元參麥冬

舌苔老黃或生芒刺身熱退去銀花連翹加元明粉一錢或至二三錢此藥最爲猛烈宜察體之虛實病之重輕酌量用之

舌上無苔或絳色用生地元參麥冬川連之類以養營陰火忌攻下如稍黃之類

(二)虛斑一說見象甚微千百斑中不會一見葉天士曰如淡紅色四肢清口中和脈不洪數非虛斑卽陰斑或胸微見數點面赤足冷或下利清穀此陰盛格陽於上而見當溫之邵新甫曰想前人此例無非教後人勿執見斑

爲實熱之義也二氏語意精確醫者神而明之可也

由前之說發斑之證已明矣然發斑與發疹誠有不同之處茲再論之

(一)溫疹與痧麻通稱夫溫疹由於風溫溫熱失於清解致肺胃邪熱逼迫血分而出證見頭痛肢痠寒熱嘔吐咳嗽氣粗一二日即發者爲輕三五日始發者爲重一週以外隱伏不透者爲尤重假如痧疹透出氣色紅潤顆粒分勻雖有挾熱下利甚至五色利俱見亦無妨緣熱毒既由下部排泄中上焦邪熱自可迎刃而解方書所謂疹不忌瀉是矣若隱疹不透邪熱內陷喘促不止化源閉塞清不升濁不降必腹痛脹悶二便不通多不易救治法亦不外清化治其初涼下攻其後佐以養陰之品而已茲錄方於後

解肌透疹湯

銀花 二錢至五錢
丹皮 二錢至四錢
梔子 二錢至四錢
竹葉 二錢至四錢

連翹 二錢至三錢
赤芍 二錢至四錢
大青葉 二錢至五錢
鮮蘆根 三錢至六錢

生地 四錢至一兩
黃芩 二錢至四錢

右藥水煎服滓再煎服

加減法

咳嗽去生地加杏仁川貝母桑葉二錢至三錢萹皮三錢至四五錢

嘔吐加川連一錢至二三錢

口渴欠津加石膏五錢至一兩知母三錢至五錢生地元參麥冬均可多用熱毒甚加犀角羚羊金汁神昏譫語加紫雪丹牛黃丸之類

小溲不通或赤澀重用竹葉梔子再加滑石三錢

疹後宜清熱敗毒以原方去丹皮赤芍加元參五穀蟲菘豆皮甘草之類

(二)白疹風熱挾濕邪咳嗽胸悶不知飢邪居氣分留連不解一旦由肌肉而外達皮毛故發爲白疹治之以辛涼淡法其或久病中虛氣分大虧而發爲白疹者如脈微弱氣怯神疲爲不治之證

薏苡竹葉滑石湯

桑

葉 二錢至三錢

滑

石

一錢至三錢

牛蒡子

一錢五至三錢

甘

草

一錢至一錢五

杏仁 二錢至三錢
竹葉 二錢至四錢
連翹 二錢至三錢
通草 一錢至二錢

改仁 二錢至四錢
廣皮 一錢至一錢五

右藥水煎溫服滓再煎服

(三)風疹此疹由襲受風邪客於肌腠中邪未深入故無表裏現狀惟祇見雲頭佈密或大顆如痘但無根盤或牽連成片皮膚搔癢遇風更甚余以清熱化風屢治屢效

清熱化風湯

銀花 二錢至四錢
淨蟬衣 一錢至三錢
防風 一錢至二錢
白蒺藜 二錢至三錢

甘草 一錢至二錢
萊豆皮 三錢至六錢
僵蠶 一錢五至三錢
鮮蘆根 三錢至八錢

白芷 一錢至二錢
丹皮 二錢至四錢

右藥水煎溫服滓再煎服

綜上斑疹諸說已詳言之所列各方皆由驗治而來酌古斟今非徒托虛言惟用藥分量不能畫定蓋因吾國北地高燥南方卑濕人民體質有剛柔之

分病情有重輕之判如欲求盡善盡美務在臨證者體察病形神而明之庶
幾可矣

卷之五終

傳染病八種證治晰疑卷之六

吳縣曹元森異軒甫纂定

白喉證治第五

白喉忌表抉微一書論證明論治備實為治白喉之準繩惟其重在養陰清肺一法而於導藥出以鄭重之戒消藥一層亦未免有小疵之處除溫化毒湯之葛根一味輕揚升發亦非所宜黃芩苦降治溫之要藥而有拘忌之語似欠研索茲將其論證論治原文略加刪訂歸於大醇以供研究是病者之採擇焉

白喉忌表抉微曰白喉古無此證故少專書世稱難治然非難也未明其理耳人但知肺之燥而不知由於胃之蒸人即知胃之熱而不知由於腸之塞腸塞則下焦凝滯胃氣不能下行而上灼於肺咽喉一綫之地上當其衝終日蒸騰無有休息不急治與治之不當則腫且潰潰且閉矣張氏白喉捷要云白喉初起惡寒發熱頭痛背脹遍身骨節疼痛喉內或極痛或微痛或不痛而喉內微硬有隨發而白隨見者有至二三日而白始見者或由白點白條白塊甚至滿喉皆白者所治皆同治

之之法惟有以厚重之藥鎮其上如以巨甑蓋頂使燄不上騰復以清涼之藥潤其下如以濕綿禦礮使火不內射極盛者再掃除其中宮以抽柴薪開通其下道以漏炸炭醫者之能事畢矣夫自上至中至下本有可通之路以表藥治之猶舍其正途而闢旁門反使四塞左矣邪毒之內蘊火也實烟也尋常表邪輕烟而已此則如蠻雲毒霧蒼蒼鬱鬱一經表散僅能紛竄於經絡之中而不能透出於皮毛之外愈入愈深有入無出迨自知其誤翻然變計不先追其藥毒而徒盡其當然無益也

森按治病須先辨寒熱表裏虛實六者辨認不清則動輒得咎矣蓋溫病皆裏證由內而達外有表證無表邪譬如爐火熾於中而熱越於外復以表藥散之則火得風助頃刻烈燄飛騰無異爲賊助威故治溫之法須直搗賊巢一鼓而下之方爲妙手非若外來之寇方欲侵入可以禦之於外者也此理之最明而易見者乃世界上殷殷沅沅之醫家獨於此而不之察吁其甚矣解表藥之毒春用蠶食過桑葉孔多者二片夏用荷花蒂連須者七個秋用葶

薺苗稍黃者九枝各寸許各用生青果核磨汁或打碎五枚不必拘定四時但

有現成鮮者可用卽用之加入養陰清肺湯中爲引一劑後照方服不加引捷要

云如有辨證未清誤服升提開散辛溫之劑視病之輕重以生棗豆研細末重者一茶碗輕者一酒杯冷水調服另製大米粥一碗先服粥後服藥則誤服之劑卽能解除矣

此證起時發熱者多證之輕者脈不甚洪實初不見白醫者不察往往

誤爲風邪用表藥而熱退方謂有效也及白點既見而病已增重大半矣捷要云白

喉初起惡寒發熱乃毒氣初作於內至二三日喉內見白寒熱自除或者不悞以爲表藥有功而不知不服表藥其熱亦自退也迨病重而服

養陰清肺湯一二劑而不見速效又復反覆改圖一誤再誤病其有不殆者乎

故認證既的尤以守方爲第一義也捷要云如有內熱及發熱照方服去其熱自除卽白有加仍毋改藥蓋內病不除白

何能淨愈發白愈守方久久服之自有效驗切勿求速而表散

森按表散固犯大戒而以養陰清肺堅持到底卽兵家長圍破賊之法然曠

日持久究非治溫病所宜服養陰清肺而病不見退正宜揣度病情標本兼

治方可捷如影響蓋喉之白由於胃之熱毒上凌也以正兵與之持以偏師

攻拔其後則功成易於反掌不可失下誤機

風邪之證亦宜清解不當表散表之過當不外出而內竄勢易易也且立意不用表藥則中下之醫不能辨證初起者亦不致大誤而殺人玉鑰書中忌用諸藥人嫌其選擇之過泥吾猶謂其徵引之未全細辛升麻桂枝蘇葉之不可用固不待言卽僵蠶蟬蛻馬勃等品治喉家所奉爲至寶者皆殺人之具也各宜守之如厲禁視之如酖毒庶不誤矣雙單蛾證亦屬於裏凡肺之本色上現於喉始有此象豈有皮毛之證而能顯此形色於吭舌之間乎故治法亦宜養陰清解之爲愈也至云上熱下寒者宜以熱藥冷服此指真寒假熱而言白喉之證係真熱假寒何所忌於寒涼乎若熱極則非稍黃不足通道路猛藥疾馳而下裏熱以行性不留連腸胃一淨何有他變要知此證本不難治治之不善而種種敗象見非此證之本象實投禁藥者有以造成之也與生而致死同一綫幽微氣不能透因而逼斃其心不卽死也故死於此證者最慘行醫者若一朝誤治退而深思以期萬一之當則死者雖不能生生者猶可不死歐陽公曰求其生而不得則死者與我皆無憾焉言治獄也而吾於醫亦云然

白喉第一方

除温化毒湯

白喉初起證象輕而白未見者服此方一見白象即改服養陰清肺湯

冬桑葉 三錢

金銀花 三錢

川貝母 三錢

薄荷 一錢

生地 三錢

竹葉 三錢

小木通 一錢五分

枇杷葉 生用拭淨毛去筋三錢

生甘草 一錢

森按此方以辛涼潤肺辛苦甘寒化胃熱白喉初起輕者即可見效惟原方用葛根二錢未免爲此方之累葛根雖有生津止渴解肌退熱之能其性輕揚升發於温證甚不相宜白喉已成炎上之火更宜斟酌茲將葛根改去較

穩

加法

胸下痞悶者加枳實二錢

大便閉者加全瓜萹五錢至一兩

小便短赤者加車前子三錢燈心五分

白喉第二方

養陰清肺湯

此方乃治白喉之聖藥翼然入柱顛撲不破輕者日服二劑重者日服三劑始終以此爲主方自可全愈

大生地 一兩

元參 八錢

麥冬 六錢

丹皮 四錢

川貝母 四錢

白芍 四錢

薄荷 一錢五分

生甘草 二錢

加法

喉間腫甚者加生石膏五錢

森按石膏辛涼而淡質重味薄少用無效煨之則成石灰而失辛涼之效力與未服同故改爲生石膏而註出之

渴者加天冬四錢黃芩三錢

森按挾微忌黃芩而不知胃熱衝肺非苦降之味不見功渴甚者火熾於下津液將竭與其益水不如去火用黃芩之苦降以撤火則渴可解也何忌之有

森又按苦寒傷胃之說又當別論胃家無病而用苦寒是誅伐無過若胃熱方熾炎上爍金則苦寒正是治病之良藥何傷也

胸下漲悶者加川黃連三錢枳實二錢

森按原方加神麴焦查是化滯之藥而不知溫病之漲悶皆熱結於胸非食不化也况胃火旺時多食善飢是其明證故宜以黃連枳實去熱開痞爲上面赤身熱舌苔黃者加銀花連翹青黛三錢

大便秘結者加青寧丸元明粉各二錢

小便不通或短赤者加車前滑石各四錢通草二錢

白喉第三方

神仙活命湯

白喉初起卽極痛且閉飲水卽噎眼紅聲啞白點立見口出臭氣病勢已達極危之地前二方皆不足挽救須以此方日服三劑或已延誤二三日而致危者或誤服表藥而致此者均宜此方急洩其毒

龍膽草 三錢

元參 八錢

板藍根 六錢

生石膏 六錢

白芍 三錢

川黃柏 二錢

生甘草 一錢

大生地 一兩

瓜 三錢

生梔子 二錢

生軍 三錢

加法

舌有芒刺神昏譫語者加犀角二錢

大便閉塞胸下滿悶者加枳實二錢大黃二錢

便閉甚者再加芒硝二錢

小便短赤者加車前梔子滑石各三錢

以上三方並加法隨證輕重神而明之無不奏效所謂在精不在多也

吹喉藥 瓜霜散

喉證雖發自內然毒盛上攻腫滿閉塞黏痰膠結乾燥無津水藥不能下咽全仗吹喉一法去其黏痰然後服藥易於為功此散去腐拔毒消腫凡一切風火喉證皆治

西瓜霜 二錢

飛辰砂 四分

梅花冰片 一分

人中白 一錢

明雄黃 四釐

犀牛黃 一分

真陳青魚膽礬 五分

各研細末再入乳鉢內和研至極細爲度頻吹神效

卷之六終

傳染病八種證治晰疑卷之七

吳縣曹元森異軒甫纂定

山陰陳世珍伯雅甫述

天然痘證治第六

丁氏福保醫學叢書將天花列入急性傳染八大症中其所言一切情形如發熱日期及見苗起脹養漿收結等證與中國方書所論皆同惟所用藥性何者爲補何者爲散何者爲涼何者爲熱不知其詳不敢強解西人與中國人體質不同飲食起居亦各自爲風氣若必欲牽強求合未免附會且欲爲中國人謀治療之法則不如仍於中國方書內察其適用者爲之說法西人精於種痘小兒與成人皆常常施種本無待取法於中國之治痘則是篇亦不過爲我中國之窮鄉僻壤留此準繩已爾故不與丁氏醫學叢書所載強爲條條比附焉

中國百年以前天花一證實爲小兒第一難關因此而喪生者十居三四故有專門痘科之醫生蓋所以鄭重其事也然方書所載治法不一有注重於清泄

者有注重於溫補者其身無實熱又非虛寒者所謂之狀元天花無須服藥真精於此道者雖日日診視若無變故卽不處方彼不甚了了者妄爲用藥非徒無益而又害之但此等狀元天花實居少數其中或有實熱或有虛寒則不能不賴醫爲之調劑故痘科亦爲醫學中之一重要部分常爲人所注重者也自西法種痘之術傳至中國小兒多蒙其福除窮鄉僻壤無人能習其事仍不免自出傳染外其通都大邑類皆知種痘之有益無損但期將來無一處不知種痘無一處不能種痘則中國之小兒脫去此第一難關保全性命實非少數要在地方官竭力提倡之或由政府將此項列入自治中其造福豈淺鮮哉與此證相同亦能傳染者則有溫痘又名水痘治法與癩痧疹相同宜用涼下藥萬不可用溫散溫補以速其死其溫熱之輕者出痘稀少略服涼下藥卽愈其重者遍身皆是三四顆連成一片者大熱不退不似真痘之發熱有期且痘頂無臍灌漿亦不如真痘之根下紅暈晶白如珠若熱總不退再有挾熱下利或熱結旁流等證皆不可治真痘似此者名蛇皮痘亦難救療餘與丁氏所論略同

中國治痘方書種類雖夥大抵不免拘於成見惟莊在田先生所論不偏不倚可稱完善今謹擇其要以供同道之採納

莊在田先生曰此證中國方書所論參差不一有謂痘卽瘡之同類而以治瘡之法治之者大抵皆本之於諸瘡痛癢皆屬於熱入字所以立意先言解毒開方定用寒涼不知痘證全以發透爲吉起發必賴氣血滋養方能自內達外齊苗灌漿結痂無非陽氣爲主寒涼則血滯剋消則氣傷血滯氣傷毒氣乘虛深入此痘證塌陷之所由來也譬之猪脬若欲其脹滿必需以氣充之散其氣立即陷矣是痘之始終全憑氣血但得氣血充足則易出易結何需用藥氣血不足則變症百出宜審定爲氣虛則補氣血虛則補血所以隨手見功夫痘之欲出陽氣蒸騰小兒發熱正是欲見苗斯時氣虛者宜服補中益氣湯血虛者宜服荆防地黃湯兼寒者宜大溫中飲或大補元煎察其體之虛寒過甚者另外加鹿茸所謂培補氣血疎通經絡無不立奏全功時醫不明此理乃言補藥太早則補住毒氣不知補中卽所以脫毒灌根卽所以發苗萬無補住之理且有

散藥在內如陽和湯治陰疽內有麻黃白芥子無非疎通經絡有熟地鹿茸無非大補氣血此實先哲治痘之心傳也要之治痘之法不外實熱虛寒二種何者爲虛寒凡小兒向日氣體薄弱面色青黃昏淡畏寒大便溏而不結小便清白飲食不多或不運化等證知爲火虧出痘時必難灌漿亦難結痂速宜培補元陽以防變證何者爲實熱小兒氣體壯實飲食易消氣壯聲洪出痘時大便結燥小便赤臊口鼻出氣皆熱甚則如火惡熱喜涼是名實熱審明果是實熱方可暫行清解輕者荆防地黃湯改爲生地再加大黃重者白虎地黃湯一二劑而熱退矣審虛實之法當以大小便爲主小便清白大便不燥雖身熱不可認爲實火蓋出痘未有不身熱者若專以身熱爲實火則誤矣

發熱

痘者胎中之陰毒也必賴陽氣以成之小兒出痘大約發熱三日肌肉鬆透然後能見點齊苗熱退乃真陽內伏交會於陰腹發熱三日是運水到苗以成清漿漿足熱退及至養漿真陽外出發熱三日化毒以成膿膿成熱退而陽伏毒

既化膿又必發熱蒸乾方能結痂痂落後真陽外出蒸化斑點謂之燒斑倘有
黑斑乃是火衰並非因食鹽醬之故所謂痘稟於陰而成於陽也如此治痘之
法始終以補氣血扶陽氣爲第一義用藥以溫補少加發散爲首務否則氣不
足則痘頂不起火不足則漿不調且恐厥逆腹痛陰寒起而壞證作矣痘科有
七日黃芪八日參之說良有以也

或問曰痘宜溫補此理甚明如兼發散豈不傷氣不知純用散藥汗多則傷氣
少加發散藥於溫補藥中則血脈疏通痘瘡易出無壅滯之患受解散之功所
以古方補中益氣湯有升麻柴胡大溫中飲內有麻黃溫中補氣尙用散藥可
見古人用心之妙所以痘之初起斷不可減去散藥此卽張景岳雲騰致雨之
法林屋山人陽和湯用麻黃白芥子亦此意也

或又問曰痘宜溫補兼散此理已明後開大補元煎六味回陽飲此二方重用
桂附並無散藥兼用龍骨粟殼收澇之藥其義何取不知溫補兼散乃治尋常
痘瘡之法更有一種小兒發熱一二日卽遍身出痘方書無方時醫袖手此乃

陰毒太重陽氣太虛陰毒一發陽氣已消故泄痢不止泄出之物多作青黑色肝氣所化胃氣將竭之兆速宜大補元煎六味回陽飲二方大劑連進可以扶元陽可以消陰毒操起死回生之功有鬼神莫測之妙二方合煎名返魂丹治痘收效指不勝屈至於清火解毒涼藥必察明果有實火者方可暫用若誤用於齊苗時則水不能升而頂陷誤用於養漿時則漿不能稠而癢塌癢塌者真火衰也速宜參熟並用桂附同煎脾胃雙補大劑疊進尙可挽回否則寒戰咬牙吐泄交作不可爲矣至於身涼而膿不乾痂落而癩不化乃痘後發毒皆因誤服生地銀花澤瀉連翹等涼藥之故不可不知熱有邪正必當體察正熱者陽氣蒸騰自內達外喜露頭而不惡寒時熱時止兼有小汗手足溫和飲食有味二便如常所謂內外無邪不必服藥邪熱者偶受風寒頭痛惡寒四肢冷而無汗荆防地黃湯一二劑儘可解散表邪而愈古人云熱不可盡除真格言也

形色

痘以飽滿爲形紅活爲色頂陷不起是氣虛色不鮮明是血虛宜培補氣血爲

主真陽虛者乃無紅暈甚至通身皆白身涼不溫宜大補元煎陽回體溫轉白爲紅矣又有一種遍身血泡者此非血多乃氣虛不能統血故血妄行急當大補元煎陽氣充滿血泡變白而成功矣庸醫不明此理謬言爲熱誤用寒涼變證日增形與色外象也必要飲食有味二便如常知其無內病可以不服藥若二便不調飲食不下煩躁悶亂夜中不安形色雖好亦甚可憂必當察其病情何如小心用藥挽回方妙形色不佳多半是氣體虛寒手足厥冷頭重神疲便清泄洩等證必當大補元煎兼用桂附若泄洩不止並當加入龍骨粟殼等藥以收瀆之方可回生

痘以紅爲貴有圈紅暎紅鋪紅之別圈紅者一線紅圈緊附痘根最爲佳兆暎紅者痘根血色隱隱散漫亦氣不收之故速宜大補氣血鋪紅者一片平鋪無痘之處亦紅所謂地界不分若兼不惡寒口渴而臭小便臊短大便燥結內熱有據宜白虎地黃湯以利之熱退身涼卽宜乎補不可多劑又有一種錫光痘身涼不溫色白不紅此乃陽虛陰象也宜大補氣血桂附同施氣足陽回痘根

紅而漿稠痲結矣又有一種根無紅頂含黑水者乃陽氣太虛陰氣凝結亦宜大補元煎兼用桂附黑水化爲膿矣痘有五泡曰水泡膿泡灰泡血泡紫泡痘有五陷曰血陷白陷灰陷紫陷黑陷水泡者皮薄而明經言氣熱生水要知清漿皆水何以不成膿火少故也必當姜桂附子等藥大劑陡進水必成膿若誤用涼藥作泄後變爲白陷膿泡失治則破流膿水灰泡失治轉爲灰陷二證亦宜參熟桂附大劑多進若有小粒發出謂之子救母生意在焉血泡者乃血虛非血熱亦宜大補元陽否則變爲血陷紫泡者其證有二紫中帶青者亦因氣虛不能攝血陰血凝聚而成其人必身倦惡寒舌苔白飲食不多大小便清白速宜大補元陽否則變爲紫陷又有一種紫焦枯者乃純陽無陰之症其人必口乾惡熱小便短大便結此實火也宜清涼解毒白虎地黃湯酌加大黃以行之但得線漿尙可望生失治轉爲黑陷又有一種小兒因服涼藥腹中作痛嘔吐泄利將成慢脾頭面大熱唇焦舌黑亦似實火此乃火不歸元之故實火者二便燥閉虛火者泄利不止全在細心體察方得其真經云有者求之無者求

之實者責之虛者責之蓋言萬病皆宜體察虛實寒熱豈僅治痘一證爲然哉
起脹

痘至開盤頭面腮頰亦腫謂之起脹至膿成漿足痘回而脹消謂之收脹蓋緣毒氣由內達外此時尙在肌膚之間故腮頰亦隨之而腫迨至膿成漿足毒氣盡化爲膿而脹自消亦必脾胃強健方能如此若當起脹而不起脹乃由元氣內虛不能送毒外出之故宜用大補氣血之藥少加發散大補元煎大溫中飲相間服之盤自開而脹自起若痘不開盤而頭面先腫乃元氣大虛此乃虛腫非起脹也其痘必不能起脹亦宜大補元氣腫自消而脹自起又有痘已回而腫不消乃元氣大虛不能攝毒餘毒留於肌肉之間不能盡化爲膿所致亦宜大補元煎大溫中飲相間服之餘毒盡化而腫消矣痘書云痘出稠密封眼者有救不封眼者無救此言不確起脹者有救不起脹者無救此言甚確封眼者眼眩多痘胭脂水塗之仍可以不封眼不起脹者乃元氣大虛何以送毒外出必當大補元煎附子肉桂大劑多進脹起而毒化一定之理也

養漿

痘之緊要全在養漿漿成則毒化漿不成痘斯壞矣自發熱見點齊苗灌漿無非爲養漿而設若顆粒稀疏根盤紅潤精神爽健二便如常乃上等證也可以不藥倘形色平常全憑用藥助其氣血以養其漿最怕者無熱全仗真陽充足出而用事方能化毒成膿設陽氣不足何以蒸化其毒宜大補陽氣實爲上策緊防泄瀉瀉則中虛陽氣一虧毒必內陷定當預爲隄防補其陽氣助其脾胃膿乾痂結而成功矣前藥方無非補中益氣湯大補元煎之類相兼服之萬無一失彼世之面麻者皆因不明此理養漿時被庸醫誤用消伐之藥中氣下虧所致若於養漿時大劑溫補血氣充足落痂後斷無面麻之患又有一種小兒痘後滿頭潰爛名曰虛陽貫頂又曰髮疽經年不愈此乃出痘時誤服涼藥胃中受寒陽無所倚上沖頭頂譬之火爐中以水潑之則熱氣必上沖此理無二速用大補元煎大溫中飲相間服之引火歸元旬日可愈

收結

收者漿回而脹收也結者膿乾而痂結也收結如法其功成矣倘漿回而腫不消膿成而痂不結亦是真陽不足身無熱不能乾漿化毒之故膿漿充足必賴陽氣薰蒸方能結痂陽氣二字豈非痘證始終必需之至寶設此時氣體虛弱不能結痂必相其虛實無非培補氣血無不立見奇功又有一種漿不乾而生蛆謂之蛆痘總由陽氣不足之故俱宜大補元煎大溫中飲相間服之膿自乾而蛆自化痂結而愈

痘毒

痘本胎毒自內達外若出痘時盡化爲膿痘後無餘毒矣當其初總宜培補元陽兼用散藥毒氣方能盡出化而爲膿時師用黃芩連翹澤瀉等藥在彼以爲涼藥可以解毒豈知痘乃胎中陰毒得陽氣則行得涼藥則滯毒氣因涼藥留滯於肌肉之內痘後所以發爲大疽名之曰痘毒皮色不變者居多宜大溫中飲數劑全愈其色紅白相兼半陽半陰證也荆防地黃湯與大溫中飲相間服之數日亦愈倘已潰爛亦荆防地黃湯與大溫中飲相間服之計日可愈荆防

解其凝結姜桂散其寒涼所以可愈倘時醫治之不分陰陽統言火毒仍用生地黃連翹銀花等藥以致堅腫不消潰爛不斂清膿淋漓久而不愈漸至泄瀉不食脾胃一敗不斃鮮矣若紅而帶紫者乃陽證也方可以荆防地黃湯愈之大便結者下之然陰證多陽證少痘後並未見有陽證之毒也

痘症諸方

補中益氣湯 此方補氣散毒氣虛者初出痘時服三四劑痘易起發痘頂陷者亦宜服之

黨參 三錢

黃芪 二錢

白朮 一錢五分

炙草 一錢

當歸 二錢

陳皮 五分

升麻 三分

柴胡 三分

加薑煎可與荆防地黃湯相間服之

荆防地黃湯 此方補血散毒血虛者初出痘時服三四劑痘易灌漿與前後各方相間服無所不可

荆芥 一錢

熟地 四錢

山藥 二錢

丹皮 一錢

防風 一錢

雲苓 一錢

山萸 一錢

生草 一錢

加生薑二大片為引黃酒沖服

大溫中飲 此方補氣血散寒邪提痘漿散痘毒凡痘頂不起空殼無膿嘔吐泄瀉脾胃不開痘色不紅將欲塌陷速宜煎服並與大補元煎相間大劑連進溫中散寒立時起發功難盡述

熟地 五錢

白朮 三錢

山藥 二錢

黨參 三錢

黃芪 三錢

炙草 二錢

柴胡 一錢

麻黃 一錢

肉桂 一錢

炮薑 一錢

加生薑三片灶心土水煎濃用夏布擰出藥

汁少加黃酒多次灌之不可減去麻黃汗多者減之

大補元煎 此方大補氣血端治痘症誤服涼藥嘔吐泄瀉痘不起發危在旦

夕速宜大劑連進不可減去附子與六味回陽飲相間服之立見奇功有鬼神

莫測之妙倘二三劑後泄瀉不止酌加附子更加龍骨粟殼各一錢倘泄瀉全

止減去附子若附子太多則小便閉塞

熟地 五錢

黨參 三錢

山藥 二錢

杜仲 二錢

枸杞 二錢

黃肉 一錢

炙草 二錢

故紙 二錢

白朮 三錢

肉桂 二錢

附子 一錢

加生薑三大片好核桃仁

三個打碎為引痘後減去附子只用肉桂數分調理數劑計日可以復元

六味回陽飲 此方大補元陽治小兒氣血本虛痘瘡白塌或誤服涼藥嘔

吐泄瀉將成慢驚危在頃刻宜速服此方倘有轉頭即加入大補元煎之內同

煎疊進名返魂丹真仙方也

附子 一錢

炮薑 一錢

當歸 三錢

肉桂 二錢

黨參 三錢

炙草 一錢

加胡椒細末三分灶心土水澄清煎藥或減

去附子亦名六味回陽飲以多進為妙

白虎地黃湯 此方去實火解邪熱治小兒出痘發熱不退口渴喜涼痘瘡

黑陷小便赤臊大便閉結口鼻氣熱等症酌加大黃以行為度若二便清白不

喜飲冷身雖大熱乃是虛火仍宜溫補所謂甘溫退大熱不可妄投此藥

生石膏 三錢

生地 二錢

當歸 三錢

枳殼 一錢

大黃 一錢五分

木通 二錢

生草 一錢

澤瀉 一錢

加燈心爲引熱退身涼卽以荆防地黃湯調理之

卷之七終

傳染病八種證治晰疑卷之八

吳縣曹元森異軒甫纂定

吳縣陳舒企董甫述

霍亂證治第七

丁氏醫學叢書霍亂一證依據東醫列於急性傳染病之內其論病源尙與中醫合惟未能如中醫之條分縷別而東醫之治法亦不能完善我國武林王潛齋霍亂論一書祖述素靈辨別寒熱極盡治霍亂之妙爰卽王氏原文輯錄於左

霍亂論

王士雄孟英原著陳舒節述

總義

素問六元正紀大論云太陰所至爲中滿霍亂吐下 太陰濕土之氣內應於脾中滿霍亂吐下皆中焦濕邪爲病第土無定氣分寄於四季又惟季夏爲獨旺蓋大暑至秋分六十日是太陰司令恰與君相二火合化喻氏以三氣同推

允爲卓見故太陰所至亦不必拘定司天在泉而論也如霍亂一病每發於夏秋之間者正以濕土司氣而從熱化耳若其中陽素餒本已土不勝濕而復襲涼飲冷則濕從寒化而成霍亂者亦有之然熱化者天運之自然寒化者他氣之所逆知常知變庶可以治霍亂焉

靈樞經脈篇云足太陰厥氣上逆則霍亂 足太陰脾土臟也其應在濕其性喜燥鎮中樞而主升清降濁之司惟濕火盛而滯其升降之機則濁反厥逆於上清反抑陷於下而爲霍亂雖有熱化寒化之分必以治中焦之濕爲要領也傷寒論云問曰病有霍亂者何答曰嘔吐而利名曰霍亂 此設爲問答以明霍亂之病謂邪在上者多嘔邪在下者多痢邪在中焦上逆而爲嘔吐復下注而利者則爲霍亂霍亂者揮霍悶亂成於頃刻變動不安之謂也若上不能納下不能禁之久病但名吐利不得謂之霍亂也

又云霍亂頭痛發熱身疼痛熱多欲飲水者五苓散主之寒多不用水者理中丸主之 霍亂該吐下而言頭痛發熱身疼痛則霍亂之表證也面有寒熱之

分者以中焦土位乃陰陽之交而無一定之性從陰化則爲寒每因寒涼而病始發冬月多有之從陽化則爲熱因暑熱而病始發夏秋多有之然因寒者口不必渴稍渴者病必屬於熱仲景又云下利欲飲水者以有熱故也故寒熱二證卽在此辨五苓散去水以泄熱理中丸煨土以祛寒

雄推此例分列熱證寒證於左冀醫者判別陰

陽庶不倒行逆施而
暗絕人長命之戒

熱證

素問六元正紀大論云土鬱之發爲嘔吐霍亂 諸鬱之發必從熱化土鬱者

中焦濕盛而升降之機乃窒其發也每因吸受暑穢或飲食停滯遂致清濁相干亂於腸胃而爲上吐下瀉治法如平胃散能宣土鬱而分陰陽連朴飲能祛暑穢而行食滯若驟傷飽食而腕脈滑或脈來濇數模糊胸口按之則痛者雖吐猶當以鹽湯探吐吐盡其食然後以黃芩加半夏湯致和湯之類調之又云不遠熱則熱至熱至則身熱吐下霍亂 此明指霍亂有因熱而成者奈病源三因等書謂霍亂無不本之風冷遂致薛立齋張介賓輩專主於寒印定

後人眼目凡患熱霍亂者皆爲此數公等殺之矣且不遠熱三字亦非以藥食爲言如勞役於長途田野之間則暑邪自外而入矣宜白虎湯六一散之類甘寒以清之或安享乎醇酒膏粱之奉則濕熱自內而生矣宜梔豉湯黃芩加半夏湯連朴飲之類苦辛以泄之其有暑入傷元白虎湯可以加參氣虛招暑用參朮必佐清邪昔賢成法自可比例而施奈昧者妄謂勞傷之病宜補膏粱之體必虛不察其常侈談其變信乎溫熱輒動殘生良由讀書不明理反爲書所蔽欺己欺人彼自不覺耳

傷寒論云問曰病發熱頭痛身疼惡寒吐利者此屬何病答曰此名霍亂自吐下又利止復更發熱也 霍亂之病雖由內蘊濕熱而然但既有發熱頭痛身疼惡寒之表證則治法必當兼理其表此仲聖主五苓散之意也然表證又當分別如吸受風暑之邪而兼煩燥面垢齒燥者宜平胃去朮加梔豉竹葉薄荷木瓜扁豆之類惟感冒風涼之邪者宜五苓散若兼冷食停滯而寒熱似瘧者宜十味香薷飲加減或六和湯之類若挾痰飲而兼眩暈者霍香正氣散加減

蓋內蘊之邪每因外觸之氣而發也亦有暑暍直侵脾胃與內邪相協爲虐迨裏氣和而吐利止則邪復還之表而爲發熱者駕輕湯主之寒霍亂後表不解者有仲聖之桂枝法在

劉守真曰三焦爲水穀傳化之道路熱氣甚則傳化失常而吐利霍亂火性燥動故也 此守真釋內經吐下霍亂屬熱之文也按嘉言云內經病機十九條敘熱病獨多賴河間逐病分詳明晰所以後世宗之故原病式不可不讀也夫以著陰病論之喻氏猶且折服如是其斷非一偏之見可知矣故徐洄溪有寒霍亂百不得一之說然不可謂竟無也間亦有焉要在臨症深加詳審耳乃薛立齋之流未窺至理敢以寒多立論豈非甘獲罪於先賢妄貽殃於後世也

金匱云轉筋之爲病其人背脚直脈上下行微弦轉筋入腹者雞矢白散主之尤在涇曰肝主筋上應風木肝病生風則爲轉筋其人背脚直脈上下行微弦經云諸暴強直皆屬於風也轉筋入腹者脾土虛而肝木乘之也雞爲木畜其矢微寒而能祛風濕以利脾氣故取以治是病焉

雄按薛一瓢以轉筋與原
瘕證同推義亦本此

病式云轉反戾也熱氣燥爍於筋則攣痠而痛火主燔灼燥動故也或以爲寒
客於筋者誤也蓋寒主收引然止爲厥逆禁固屈伸不利安得爲轉也所謂轉
者動也陽動陰靜熱證明矣夫轉筋者多由熱甚霍亂吐利所致以脾胃土衰
則肝木自盛而熱爍於筋故轉筋也夫發渴則爲熱凡霍亂轉筋而不渴者未
之有也 張路玉曰嘔吐泄瀉者濕土之變也轉筋者風木之變也濕土爲風
木所剋則爲霍亂轉筋平胃散加木瓜主之有一毫口渴即是伏熱種種燥熱
之藥誤服卽死雖五苓散之桂亦宜酌用 雄按張君此言可謂先獲我心矣蓋
仲景雖立熱多雖飲水者五苓散主
之之法然上文有頭痛惡寒之表證所以仍取兩解之義是桂枝原爲兼風寒
者而設倘雖兼表證而非風寒之邪或本無表證而內熱甚者豈可拘泥成法
不知變通而徒藉聖人爲口實哉凡霍亂轉筋脈必兼弦正以木旺而侮其所
勝也濕甚者平胃散加木瓜可矣火盛者木瓜湯送左金丸爲宜雄又因雞矢
白散之意而立蠶矢
湯一方屢收奇績

舒按霍亂固屬熱多寒少至於兩腓轉筋或徧體轉筋或轉筋入腹則雖熱
霍亂至此亦不謂之熱矣考諸家之論轉筋者如孫真人云凡霍亂務在溫
和將息若冷卽徧體轉筋又云霍亂吐多者必轉筋又李挺云手足陽明以

養宗筋暴吐暴瀉津液驟亡筋失所養故輕者兩脚轉筋重者徧體轉筋手足厥冷轉筋入腹者死陳無擇云轉筋者以陽明養宗筋屬胃與大腸今暴吐下津液頓亡外感四氣內傷七情攻閉諸脈枯削於筋宗經失養必至攣縮甚則卵縮舌卷爲難治張介賓云足腹之筋拘攣急痛甚至牽縮陰丸痛迫小腹者爲急候此足陽明厥陰氣血俱傷之候也綜觀數家之言則轉筋於吐瀉之後雖有熱邪已從吐瀉而盡卽見口渴亦是陽氣浮越之象况暴吐暴瀉亡陽尤速用黃連吳萸木瓜湯而愈者尙屬轉筋之輕者耳若徧體轉筋轉筋入腹非四逆理中之類不足以回垂亡之陽也明矣王氏治溫熱諸病其識見卓越儕輩於此等處未免偶失檢點矯枉而過於正耳

寒證

素問氣交變大論云歲土不及民病飧泄霍亂 歲土不及則脾胃素虛之人因天運而更見其虛中陽旣虛寒濕自盛以致朝食莫瀉而爲飧泄甚加嘔吐而爲霍亂觀其與飧泄並稱則知利者必是積穀而非臭穢吐者亦必澄澈而

非酸濁小便之利口之不渴又從而可必矣如此纔是寒濕霍亂可以理中湯之類治之故讀書須以意逆其理自然觸處洞然無往而不貫矣且寒霍亂多見於安逸之人以其深居靜處陽氣不伸加以坐臥風涼起居任意冰瓜水果恣食爲常雖在盛夏之時原不可謂之暑病王道安論之詳矣輕則藿香正氣散或平胃加木香生薑半夏藿香之類濕甚而四肢重著骨節煩疼者胃苓湯加木香藿香大腹皮之類七情鬱結寒食停滯者七香飲頭疼惡寒無汗者以香薷飲先解其表隨以大順散等調其裏如果脈弱陽虛腹痛喜得溫按瀉出不臭者來復丹若吐瀉不止元氣耗散或水粒不入或口渴喜冷而不多飲或惡寒戰慄手足逆冷或煩熱發燥揭去衣被但察其瀉出不臭者乃內虛陰盛格陽宜理中湯甚則四逆湯加食鹽少許更有暴瀉如水冷汗四逆脈弱不能言者急進漿水散救之並宜冷服然此輩實由避暑而反爲寒傷致病若誤投清暑之劑而更助其陰則頃刻亡陽莫挽矣前人有治此病而愈者尙未確識其爲寒也遂謂夏月暑病通宜溫熱噫自己錯認面目而欲傳信後人何異痴

人說夢耶

傷寒論云吐利汗出發熱惡寒四肢拘急手足厥逆者四逆湯主之 此陽虛之體寒邪得以直入而爲霍亂也發熱惡寒者身雖熱而惡寒身熱爲格陽之假象惡寒爲虛冷之真諦也四肢拘急手足厥逆者陽氣衰少不柔於筋不溫於四末也首重汗出者爲陽有外亡之象故經用四逆湯祛其既入之寒而挽其將去之陽若止見厥逆惡寒四肢拘急脈來沉細弦緊面如塵土瀉出不臭雖屬陰寒而無汗出之候者但宜冷香飲子治之寒主收引故四肢拘急乃筋強不能屈伸之謂與熱證之轉筋迥別臨診極宜分辨苟或顛倒誤施禍成反掌

又云既吐且利小便復利而大汗出下利清穀內寒外熱脈微欲絕者四逆湯主之 此亦虛冷霍亂之候四肢拘急手足厥逆虛冷之著於外也下利清穀脈微欲絕虛冷之著於內也虛冷甚於內則反逼其陽於外矣故其外候每多假熱之象或煩躁去衣而欲坐地或面赤喜冷而不欲咽或脈大虛弦而不任

按是皆元氣耗散虛陽失守甚加喘噦最爲危險惟四逆湯可以祛內勝之陰而復外散之陽但小便復利下利清穀八字皆最著眼靈貽所謂一證不具卽當細審也倘熱霍亂因暑邪深入而滯其經隧顯脈細肢寒之假象者必有溺赤便臭之真諦臨證慎勿忽焉

又云吐下已斷汗出而厥四肢拘急脈微欲絕者通脈四逆加豬膽汁湯主之尤在涇曰吐下已止陽氣當復陰邪已解乃汗出而厥四肢拘急而又脈微欲絕則陰無退散之期陽有散亡之象於法爲較危矣故於四逆加乾薑一倍以救欲絕之陽而又慮溫熱之過反爲陰氣所拒而不入故加豬膽汁之苦寒以爲嚮導之用卽內經盛者從之之意也

又云吐利止而身痛不休者當消息和解其外宜桂枝湯小和之吐利止裏已和也身痛不休者表未解也故須桂枝和解其外所謂表病裏和汗之則愈也但此爲寒霍亂之兼有風寒表邪者而言熱霍亂後之表不解者不得妄引此例雄擬駕輕湯最爲合法然其意亦不敢出仲聖之範圍也仲聖一曰消息

再曰小和之者蓋以吐利之餘裏氣已傷故必消息其可汗而汗之亦不可大汗而可小和之也况彼熱霍亂之後津液尤虛其可妄施汗法乎此雄之所以但以輕清爲制也

又云少陰病吐利手足厥冷煩燥欲死者吳茱萸湯主之 少陰病吐利煩燥四逆者死 寒中少陰吐利交作陰盛邪極而陽氣不勝也然先厥冷而後煩燥猶有陽欲復而來爭之兆故以吳茱萸溫裏散寒人參大棗益虛安中爲治也若先煩燥而四逆者陽不勝而將絕也故死此二條本少陰中寒非霍亂也然既明霍亂之治不得不列其類證蓋恐後人遇此等病亦以霍亂法用之卽仲聖列霍亂於傷寒論之意耳

列方

五苓散

傷寒論

治霍亂吐瀉口渴欲飲水頭疼身痛發熱者

猪苓

茯苓

澤瀉

朮

桂

右爲末白湯和服

合平胃散名胃苓湯

雄按此仲聖治熱霍亂之兼

有風寒表邪之方也然隅反化裁在人善用如證與本條適合者方中當用桂枝若內伏暑濕之邪而又過食生冷者方中當用肉桂其外無風寒之表內無飲冷傷中則桂可輕用此石頑之所以示戒而河間之所以加三石吳氏之所以有四苓也苟能引此而引伸其義則無窮活法皆可心領而神悟矣

白虎湯

傷寒論

治暑火熾盛而霍亂者

石膏

知母

甘草

粳米

右水煎米熟湯成去渣服雄按治霍亂粳米宜用陳倉者

人參白虎湯

傷寒論

治證如前而元氣已虛者宜照前方加人參一味

竹葉石膏湯

傷寒論

治體虛受暑霍亂吐瀉及暑邪深入等證

竹葉

石膏

麥冬

人參

半夏

甘草

粳米

右水煎服

治熱極似陰之霍亂用地漿水煎更妙

黃芩加半夏湯 傷寒論

治體虛伏熱之霍亂

黃芩

芍藥

甘草

半夏

生姜

大棗

右水煎服

梔子豉湯

傷寒論

治暑熱霍亂之主劑兼解暑證誤服桂附而致殆者

梔子

香豉

右水煎服

雄按此傷寒吐劑也而予治熱

霍亂獨推以爲主劑蓋梔子性苦寒善泄鬱熱豉經蒸腐性極和中凡霍亂皆由濕鬱化熱而擾攘於中宮惟此二物最爲對證良藥奈昔人咸未之察也且二物之奇匪可言罄如偶以竹葉清暑風配以薏仁宣穢惡濕甚者臣以滑朴熱甚者佐以芩連同木瓜扁豆則和中合甘草鼠粘而化毒其有誤投熱藥而致燥亂昏沉者亦必藉此以爲解救厥功懋矣而古令之治霍亂者從不錄用豈非一大缺典耶

鷄矢白散

金匱

治轉筋入腹

鷄矢白雄鷄矢乃有白臘月收乾之

葱豉湯 肘後

治乾霍亂發斑

葱白

香豉

水煎和童便服

蘆根湯 千金

治霍亂煩悶

蘆根

麥冬

水煎服

地漿 千金

治乾霍亂及霍亂轉筋

掘黃土地作坎深三尺以新汲井水沃入攪濁少頃取清飲三五盞即愈大

忌米湯

羅謙甫曰霍亂乃暑熱內傷七神迷亂所致陰氣靜則神藏躁則消亡非至陰之氣不愈坤為地屬陰土曰靜順地漿作於陰地坎中為陰中之陰能瀉陽中之陽也雄謂得羅氏此言治霍亂已思過半矣蔣式玉稱其勤求古訓信不誣也按霍亂因無形之邪由口鼻吸入肺胃之絡而阻其氣道之流行乃否塞不通之病或清不能升而泄瀉無噎濁不能降而腹痛嘔吐故用藥皆以清涼宣暢為法凡周時納一口米湯下咽即脹逆不可

救者蓋以穀氣入胃長氣於陽况煎成湯液尤能閉滯經絡也姜湯熱湯飲酒澡浴並忌者爲其能助熱邪上衝也若吐瀉既多元氣耗散內已無邪者須以清米湯涼飲之以爲接續不可禁之太過而反致胃氣之難復也

柳州方

柳子厚

治乾霍亂不得吐瀉甚至冷汗出而氣欲絕者

鹽

一撮放刀上用火炙透

右以熱童便和服少頃卽得吐下而氣通矣 雄按是方

極易極效真神劑也或用新汲水和服亦可

藕汁

聖惠方

治霍亂吐利

生藕

搗汁服

木瓜湯

聖惠方

治霍亂轉筋腹痛

木瓜 一兩

水煎服餘湯浸青布裏其腓本方加桑葉七片尤良一外

台方用木瓜根皮合煎湯服

扁豆散

普濟方

治霍亂吐利

生扁豆 爲末入少醋冷水和服 雄按木瓜扁豆皆治霍亂之主藥也
於此二方可見

桂苓甘露飲 河間方

治暑熱霍亂之聖劑也

茯苓

肉桂

猪苓

澤瀉

白朮

甘草

滑石

石膏

凝水石 右爲末每服三錢水調下

桂苓白朮散即本方去猪苓
加人參也

六一散 河間方即益元散
又名天水散

治暑熱霍亂

滑石

甘草

右爲粉水飛每服三錢新汲水下

左金丸 治霍亂轉筋火邪內熾

黃連

吳茱萸

右末之以米飲爲丸梧子大每服三錢以陳木瓜五錢煎湯下 此證因

濕盛而風木行脾者石頑主平胃散加木瓜若熱勝而火爍於筋者雄獨

推是方爲妙張雨農司馬聞之極爲首肯云嘗在京見杜石樵少宰亦以此藥救活多人也然昔賢皆未采用何左金丸之塞於遇乎

黃連香朴飲

活人

治暑熱霍亂

黃連

香 薷

厚 朴

水煎服

香薷飲

治夏月受風涼有表證之濕霍亂

香 薷

厚 朴

扁 豆

水煎服

若夏月無表證

者切勿誤服香薷以疏衛氣而招暑患

十味香薷散

治虛人伏濕復兼感冒食滯而成霍亂者宜此方加減治之

香 薷

厚 朴

扁 豆

人 參

黃 芪

白 朮

茯 苓

甘 草

木 瓜

廣 皮

水煎服

本方去參芪加藿香蘇葉各消暑十全散治夏月久傷生冷復重感風寒而成霍亂者

藿香正氣散 治內停生冷外感風寒之霍亂亦主水土不服之病

藿香 桔梗 紫蘇 白芷

厚朴 半夏 茯苓 陳皮

甘草 蒼朮 坊本作大腹皮誤

右爲末每服三五錢水煎服

六和湯 治濕熱內伏外冒風涼霍亂吐瀉寒熱交作

香茹 砂仁 藿香 人參

甘草 扁豆 厚朴 木瓜

杏仁 赤苓 半夏 水煎服

平胃散 局方 治濕熱內甚霍亂吐瀉

蒼朮 厚朴 橘紅 甘草

右爲末每服七錢水煎加木瓜治霍亂轉筋

救急良方 治暑熱霍亂吐瀉轉筋

新汲水一盃冷飲之外以一盆盛水浸足忌食熱物

陰陽水 治霍亂吐利

新汲水

新汲井水不落地者

百沸湯

即日開水

各半和服

李瀕湖曰上焦主納中焦腐化下焦主出三焦通利陰陽調和升降周流則臟腑暢達一失其道二氣淆亂濁陰不降清陽不升故發為霍亂吐利之病飲此即定者分其陰陽使得其平也

傷暑霍亂方

包瑞溪

絲瓜葉一片

白霜梅肉

一錢並核中仁用

右研爛新吸水調服立瘥

金莖露

顯聖符

治霍亂轉筋

扁頭葉一握

搗絞汁一盃飲

四苓散 治濕熱霍亂胸悶溺澇而渴者

茯苓

猪苓

澤瀉

陳皮

水煎服

雄按吳氏於五苓方去桂而治胃中濕熱最有見地且以橘皮易朮則無實中之弊而有利氣之功當變而變可謂善用古人之法矣

芫蔚湯

治乾霍亂腹痛驟發深赤斑毒俗呼為番痧

益母草

以水煎濃少投生蜜放溫恣服取效或加生蘆菔汁半杯亦良

燃照湯

孟英

治暑穢夾濕霍亂吐下脘痞煩渴外顯惡寒肢冷者

草薹仁

一錢

淡豆豉

三錢

炒山梔

二錢

省頭草

一錢五分

川朴

一錢

半夏

一錢

酒黃芩

一錢五分

滑石

四錢

水煎涼服

連朴散

孟英

治濕熱內伏之霍亂兼能行宿食滌痰涎

川連

一錢

厚朴

二錢

醋炒半夏

一錢

石菖蒲

一錢

淡豆豉

三錢

炒山梔

三錢

水煎服

駕輕湯

孟英

治霍亂後餘邪不清身熱口渴及熱邪內伏身冷脈沉湯藥不

下而發呃者

鮮竹葉 四錢

淡豆豉 三錢

炒山梔 一錢五分

冬桑葉 二錢

金石斛 三錢

生扁豆 四錢

陳木瓜 一錢

省頭草 一錢

水煎服

致和湯 孟英

治霍亂後津液不復喉舌燥小溲短赤

北沙參 四錢

枇杷葉 三錢 去毛

鮮竹葉 三錢

生甘草 六分

生扁豆 四錢

陳木瓜 一錢

金石斛 四錢

麥冬 三錢

陳倉米 四錢

水煎服

蠶矢湯 孟英

治霍亂吐利轉筋腹痛口渴煩躁危急之證

晚蠶沙 三錢

木瓜 三錢

生苡仁 四錢

大豆黃卷 四錢

川連 二錢

醋炒半夏 一錢

酒炒黃芩 一錢

通草 一錢

吳萸 六分

炒山梔 二錢

右以陰陽水煎稍涼徐徐服之

冬瓜湯

孟英

治霍亂大渴

冬瓜

去皮瓢

水煮清湯俟涼任意服之

雄按承類鈴方用陳倉米作湯今余改用冬瓜湯其功更勝蓋陳倉米雖能清熱霍亂後用之頗為得宜若邪勢方張吐下未平之際服之猶嫌其守惟冬瓜甘淡微涼極清暑濕無論病前後用以代飲妙不可言即溫熱病用之亦良

外治轉筋方

轉筋起於足腓

俗呼腿肚

但以好燒酒摩擦其硬處軟散即愈一法以省頭草

同炒鹽擦之亦良

一法作極鹹鹽湯於槽中煖漬之

一法以棉絮浸

酒中煎滾取出乘熱裹之

一法以醋煎青布榻脚膝冷復易之

一法

男子手挽其陰女子手揪兩乳

一法令病人偃臥將膝腕內以手蘸溫

水輕輕急拍直待紅紫筋現起

即右陶所謂痧筋

用磁鋒刺出血立愈

並治乾霍亂

此

名委中穴在膝後對面

刮法

右陶

治霍亂痧脹乾霍亂

背脊頸骨上下及胸前脅肋兩背肩臂用銅錢蘸香油刮之或用刮舌
子脚蘸香油刮之頭額腿上用棉紗線或蔴線蘸香油刮之大小腹軟肉
處用食鹽以手擦之

雄按張會卿曰凡毒深病急者非刮背不可蓋以五臟之系咸附於背也
又須自輕而重向下刮之則邪氣亦隨之而降矣

刺法

右陶

治乾霍亂痧脹

嘗見古人遺言東南卑濕之地利用砭今以針刺出血卽用砭之道也凡
霍亂痧脹邪已入榮必有青筋紫筋或現於各處或現於一處須以銀針
刺之去其毒血然後據證用藥看其腿灣上下有細筋深青色或紫色或
深紅色者肌膚白瘦者方有紫紅色卽是痧筋刺之方有紫黑毒血其腿上大筋不可
刺刺亦無毒血反令人心煩腿兩邊硬筋上筋不可刺刺之恐令人筋弔
若臂灣筋色亦如此辨之其餘非親見不明白故不具載至如頭頂心一

針惟取挑破略見微血以洩痧毒之氣而已不可直刺其指尖刺之太近
指甲雖無大害當令人頭眩若一處刺法不過針鋒微微入肉不可深入
雄按乾霍亂因毒邪深入營分周身隧絡爲之壅塞故又謂之痧脹失
治卽死惟用針刺破取惡血取效最捷益母草蘆菔汁之治番痧皆取其
能散惡血也卽古方探吐以燒鹽和熱童便雖云性專潤下亦爲其涼血
之功有獨擅耳惟腹痛極而喜得溫按唇口刮白者乃內虛陰寒之病
慎毋誤用清涼妄施針刺而遺人天殃也

理中丸

傷寒論

治寒霍亂口不渴者

人參

甘草

乾姜

白朮

右爲末蜜丸亦可水煎作湯服合五苓散各理苓湯

附子理中丸

傷寒論

治證如前而寒甚者前方加附子一味

四逆湯

傷寒論

治陰寒霍亂汗出而四肢拘急小便復利脈危欲絕而無頭

痛口渴者

甘草 乾姜

附子 水煎服

通脈四逆加豬膽汁湯

傷寒論

治陰寒霍亂愈後四肢拘急脈微欲絕者

乾姜 甘草

附子 豬膽汁和入 水煎服

桂枝湯

傷寒論

治寒霍亂後身猶痛者

桂枝 芍藥 甘草

生姜

大棗 水煎服

厚朴甘草半夏生姜人參湯

傷寒論

治虛寒夾濕之霍亂

雄按古今治霍亂者從未論及此方予每用之以奏奇功故錄之

吳茱萸湯

傷寒論

治少陰吐利厥逆煩躁亦治厥陰寒犯陽明食穀即嘔之

證

吳黃 人參 生姜 大棗 水煎服

漿水散

潔古

治陰寒霍亂暴瀉如水汗多生冷氣少脈沉或脫者

桂枝 乾姜 附子 甘草

良姜 右爲末每服三五錢地漿水煎服

大順散 局方 治襲涼飲冷陰寒抑遏陽氣而成霍亂水穀不分脈沉而緊者

甘草 乾姜 杏仁 桂枝

右味炒如法爲末每服二三錢湯和服

冷香飲子 治陰寒霍亂脈沉細或弦緊無汗惡寒面如塵土四肢厥逆陽氣

大虛之證

附子 陳皮 甘草 草果

生姜 水煎一滾卽瀘井水浸冷服

七香飲 治七情鬱結寒食停滯而成霍亂者

烏藥 香附 枳殼 厚朴

木香 陳皮 紫蘇 水煎服

神香散 景岳 治乾霍亂腹痛之屬於寒溼凝滯脈絡者

丁香 白豆蔻 七粒 爲末清湯調下小腹痛者加砂仁七粒

王晉三曰此方治寒濕痧脹有神功與益元散治濕熱痧脹可謂針鋒相對

灸法 治陰寒霍亂 以鹽填臍內蓋蒜片安艾柱而灸之

外臺法以手拘所患脚大拇指當脚心急筋上七壯急筋即屈伸不利而拘急也喻

氏法凡卒中陰寒厥逆吐瀉色青氣冷凜凜無汗者用葱一大握以帶緊束切去兩頭留白寸許以一面熨熱安臍上用熨斗盛炭火熨葱白上面取其熱氣從臍入腹甚者連熨二三餅又甚者再用艾桂灸關元氣海各二三十壯若腠理素疏陰盛逼陽而多汗者用附子乾姜回陽之不暇尙可熨灼以助其散越乎 雄按讀仲景傷寒論乃知病屬陰虛血少者概不可灸必陽虛氣弱者始可用灸今嘉言復辨陽虛者固可以灸若陽虛至於外越者豈容再灸可謂發前人之未發足補長沙之未及也世之分別陰陽而妄施灼灸以傷人者豈特霍亂爲然乎吁可嘆已

附煖臍方 霍亂一證皆由寒邪鬱結氣閉不通因而吐瀉交作至於多利亡

陰血液枯涸則筋脈攣急手足拘牽卽俗名弔脚痧也此證朝發夕死夕發朝死無論藥力如何卽重用猛烈之藥而熱劑刮陰終於不救此散藥雖猛烈而由臍納入自能溫通臟腑不致傷陰屢試屢驗識者珍之

土獠桂心

八錢去皮

母丁香 一兩一錢

倭硫黃

五錢

生香附

一兩八錢

當門子

四錢

共研極細末每用三分納入肚臍中外用膏藥封貼一時

卽愈藥性猛烈斷不可吃孕婦忌用

傳染病八種證治晰疑卷之九

吳縣曹元森異軒甫纂定

曲阜孔繁棣伯華甫述

赤痢證治第八

痢證古名滯下又名腸澼又名大瘕瀉後人名之曰痢以其利而不利也其證治仲景早已發明論雖不多然皆示人以要義後世不察或未盡得其義乃以一己之見立說或主溫或主涼或主發汗或主利水使古人之法不能明於後世良可慨矣蓋仲景之書無不意深旨切其言雖簡而意自賅要在學者神而明之非謂古方外無以治是證也類如仲景治下利用四逆湯及桃花湯者是痢之虛寒者也主溫者卽本乎此又如治下利用白頭翁湯及葛根黃連黃芩湯者是痢之濕熱者也主涼者卽本乎此要在醫者審證立方不失古人之旨未有不應手而愈者但仲景治利之法僅存要義而後人又每以偏見立說未能詳備反使學者徒滋疑慮無所適從茲將痢證之寒熱虛實噤口奇恒休息

分別論治一病一法對證下藥庶無束手之虞矣

內經云賊風虛邪陽受之飲食不節起居不時者陰受之陽受之則入六府陰受之則入五藏入六府則身熱不時臥上爲喘呼入五藏則膜滿閉塞下爲殮泄久爲腸澼是卽後世謂之痢疾者也以內傷水穀不能運化留滯腸胃而成痢是固有不可治者然必有他因其可治而誤治者亦有之其實此病爲易治之病茲先述不可治者之因而後分虛實寒熱等證治俾閱者胸中了然腸澼身熱則死 是病爲腸胃受病傷於內者多因表病者間或有之卽身熱可無害而內傷者更見身熱所謂內外俱困陽無所依是以不治

腸澼下白沫脈浮者死 痢下白沫裏氣不能守中宮無主是以脈現浮象不可爲也

腸澼下膿血脈懸絕者死 脈何以有懸絕是氣血殆盡之象氣血殆盡未有不死者矣

腎移熱於脾傳爲虛腸澼死不可治 腎家之熱所以能移于脾家者則脾之

虛可知脾虛無能制水則腎熱上蒸脾腎俱傷是亦死也

以上所述死證固有未盡者然或內外皆困或脾腎並損或腐腸潰胃是皆痢之無可挽回者而險證如此亦不多見至於尋常下痢只要辨明虛實寒熱治之得當未有不應手奏效者更詳述於後

痢病之原因多屬濕熱是以發於秋夏者居多證屬於脾然肝主疎瀉肺主二便若肺氣清肅氣機通暢肝氣條達而不下迫脾家雖有濕有滯亦不致成痢故痢之初起責在肝脾肺三經肝氣既鬱肺氣亦不清肅濕滯在脾是內有濕邪而作痢傷於氣者則痢白傷於血者則痢赤脈來滑數後重裏急其痢白當清肺氣輕者銀菊散重者白虎湯去粳米加杏仁厚朴白芍黃芩如小便不利再加桑皮地骨皮滑石以利水有表邪而發寒熱者則加葛根以升發之肺主二便肺氣既清病當愈是以白痢在氣分萬不可用血分之藥導之入血使變赤白致輕者反重矣

銀菊散

治白痢之輕者

銀花 三錢

白菊 三錢

連翹 二錢

生白芍 三錢

杏仁 三錢
去油尖

桔梗 一錢

梔子 三錢
炒黑

牛蒡子 三錢

木香 一錢

甘草 一錢

白虎湯 治白痢之重者

生石膏 五錢或一兩
甘草 一錢

黃芩 三錢

白芍 三錢

杏仁 三錢

厚朴 一錢

有表證發寒熱者加葛根三錢小便不利加桑白皮三錢地骨皮四錢滑石四

錢

若痢既變赤或初病即赤者是濕滯熱邪已傷血分肝氣遂下迫是當引肝氣

上達兼為清熱導滯宜白頭翁湯或金花湯主之

白頭翁湯

白頭翁 五錢

黃柏 三錢

黃連 三錢

秦皮 三錢

金花湯

黃連 三錢
黃芩 三錢
黃柏 三錢
梔子 三錢

加杏仁 三錢
枳榔 二錢
當歸 三錢
地榆 三錢

赤芍 二錢
荆芥炭 一錢
生地 三錢
青蒿 三錢

甘草 一錢

下痢無論赤白中有實者腹中堅舌苔黃厚口渴心下堅拒按三部脈皆平或滑寔或有燥屎謔語寔邪在中蘊釀糾結不瀉其實病不已當用大小承氣湯急瀉之輕者當歸芍藥湯加味當歸三錢生白芍藥一兩大黃三錢枳寔二錢萊菔子四錢廣木香二錢車前子三錢(布包)知母三錢黃芩三錢厚朴三錢枳榔三錢滑石四錢主之其氣滯甚者可佐以香連丸

小承氣湯

大黃 四錢
厚朴 二錢
枳寔 一錢

大承氣湯

大黃 四錢
厚樸 三錢
枳實 三錢
芒硝 三錢
和入藥內服

下痢喉痛氣噎喘逆者名曰奇恆以其異於常痢也火逆攻肺有即時敗絕之象最爲危險病至是者多死仲景云急下之宜大承氣湯或加竹葉石膏湯開有生者

大承氣加竹葉石膏湯

生石膏

一兩
先煎

大黃

四錢

厚樸

三錢

枳實

三錢

芒硝

三錢
和入藥內

竹葉

三錢

杏仁

三錢

噤口痢者下痢熱灼津液舌乾咽澀食不得下是亦痢之險者若失其治遲不得救則腸胃腐爛而死喻嘉言之倉廩湯朱丹溪之石蓮湯似是而非難于救治際此津液乾枯胃火熾盛非升津清熱不能有效宜救胃煎及開噤湯主之

救胃煎

生石膏

四錢
或加至一兩

生地

三錢

生白芍

三錢

黃連

二錢

黃芩

三錢

花粉

三錢

杏仁

三錢

肥玉竹

三錢

麥冬

三錢

枳殼

一錢
炒

厚朴

一錢

苦桔梗

二錢

生甘草 一錢

開噤湯

黨參 三錢

麥冬 三錢

天冬 三錢

生石膏 五錢或加至一兩先煎

炒梔子 三錢

黃連 二錢

黃芩 二錢

黃柏 二錢

大生地 四錢

生白芍 三錢

當歸 三錢

杏仁 三錢

枳殼 一錢

枳榔 一錢

甘草 一錢

花粉 三錢

白頭翁 三錢

以上二方升津液清熱服後舌上津液漸復則漸能飲食可謂開噤之奇方
唐容川先生自謂悟出切實之理大聲疾呼為世之患噤口痢者覓得生路
有功後世豈淺鮮哉

下痢既久實邪漸化治之失宜或體氣虛或久痢傷腎虛象既現脈來微弱則
不能專持痢無補法若但事攻伐虛虛之禍立見不過痢證至此者少即有之
亦須詳辨是否真虛有無實邪虛實寒熱相似之際極當審察若果屬虛寒始

可按下列之法治之

桃花湯 以下二方皆治久痢虛滑無腹痛後重之主方

赤石脂 一錢 糯米 五錢 炒黑乾薑 一錢 煎湯服

烏梅丸

烏梅 十枚 去核 黃連 三錢 黃柏 一錢 人參 二錢

桂枝 一錢 細辛 一錢 黑附子 一錢 炮黑 當歸 一錢

花椒 一錢 乾薑 二錢

共為細末將烏梅在飯上蒸熟搗和諸藥加蜜為丸如梧桐子大每服三十丸米飲送下

下痢愈後時復或逾年而復發者謂之休息利是瘀血流伏於內有虛實之別實者攻下為法或服清寧丸或當歸龍薈丸虛者則調中益腎兼化瘀積宜歸脾丸加檳榔枳實厚朴生牡蠣為丸久服之

痢病既愈壯者輕者固可自復弱者重者難免傷脾自復者無待調理而傷脾

者不爲診治終恐有他患是以宜養脾陰不可助胃陽蓋胃陽盛則多食而傷脾脾陰強則運化之力健宜養脾陰以爲善後

歸地養榮湯

當歸 三錢

生地 三錢

山藥 三錢

麥冬 三錢

杭芍 三錢

蓮子青心 三錢

桑葉 三錢

荷葉 三錢

石斛 三錢

肥玉竹 三錢

甘草 一錢

加生熟薏米各四錢

滯下一證東西醫亦列於傳染病之一者名之曰赤痢觀丁氏福保赤痢原文所論赤痢之病狀暨原因與中國方書所謂痢疾相符但輕重混合未能分晰雖謂之爲一種原蟲寄生於腹流行傳染害人生命然又自謂醫者之意見尙未一定而隔離看護則同於溫疫且食以肉汁鷄卵牛乳酒類百人中死七十人之多亦云慘矣是病中國數千年前已經發明其治法迄今而大備治愈者多而死者少茲就張石頑陳脩園楊栗山唐溶川諸人所著準之於古驗之於今者分別虛實寒熱述出證治條列於前以備參攷其庶幾乎

卷之九終

傳染病八種證治晰疑卷之十

吳縣曹元森巽軒甫纂定

溫役應用藥目註釋

治溫役之方藥大抵皆用辛涼甘寒苦寒鹹寒之類既無多方用藥自必不多是卷藥品皆係治溫役之用他如溫燥升散補瀉之性與此病無關者概不多及

桑葉

味甘性寒治寒熱咳嗽明目止汗利大小腸

菊花

味甘性平治頭眩目翳肌死濕痺通利血脈一切遊風

薄荷

味辛性涼發汗去風清頭目療霍亂通關節消宿食

連翹

味苦辛平治心經客熱散諸經血結排膿止痛通利小便

生石膏

味辛性寒質重解肌頭疼齒痛療陽狂止消渴化斑疹能發汗又能止汗

知母

味苦性寒清金滋水涼心解渴治陽明實火瀉膀胱熱邪

黃芩

味苦性平治諸熱失血解渴利水枯芩瀉肺火而理嗽化痰目赤疔癰條芩瀉大腸而止腹中絞痛下利膿血

天冬

味甘苦性寒定喘定嗽消痰消血止消渴通二便

麥冬

味甘性微寒散心腹結氣退肺中伏火止渴生津血熱妄行

丹皮

味辛苦性微寒治時氣頭痛去血中伏火涼血散瘀無汗骨蒸

炒梔子

味苦性寒瀉三焦火屈曲下行懊懣不眠通利小便

瓜萸

味苦性寒結胸痰喘吐血瀉血 瓜萸仁潤肺降痰消腸中宿垢 瓜萸根卽

天花粉止渴生津退煩熱

通草

味甘苦性平瀉肺利小便

金銀花

味甘性平治時氣風熱消癰腫清血痢

蒲公英

味甘性平治時行發頤潰堅腫消結核

犀角

味苦酸鹹性寒涼心瀉肝搜胃家伏熱時疫發狂發斑吐血失血蓄血譫言痘瘡黑陷消癰化膿

杏仁

味苦甘性溫治肺氣喘促解肌出汗潤大腸氣閉上焦風燥

川貝母

味辛苦性微寒清心潤肺化痰利咽浙貝性略燥不如川產者佳

大青葉

味苦微鹹性寒治時氣寒熱陽毒斑疹挾熱毒痢喉痺丹毒

板藍根

味苦性寒溫毒發頤化斑消腫

紫花地丁

味辛苦性寒治一切癰腫發頤瘡瘍

生大黃

味大苦性大寒蕩滌腸胃推陳致新逐血痺瀉實熱若懷孕病溫宜早下免致墮胎所謂有故無隕亦無隕也

蓮子心

味甘苦性平清心滌煩熱

川黃連

味苦性寒瀉心開痞降逆止嘔天行熱疾驚悸煩躁目赤腹痛利水厚腸

甘中黃

味苦性寒治溫疫發狂痘瘡黑陷解諸毒敷疔瘡

枳實

味苦性寒破結胸逐痰癖開幽門利五臟

羚羊角

味苦鹹性寒清心瀉肝理肺降火溫病目赤耳聾神昏瘧閉兒科痘疹清血分熱毒療驚風抽搐

川鬱金

味辛苦性寒破血中之氣吐衄痘疹敗血衝心

龍膽草

味苦澇性大寒瀉肝膽火除胃家熱清膀胱濕火溫熱下利客忤驚癇

滑石

味甘淡性寒上通毛竅下利小便宣九竅之閉行六腑之結孕婦忌服

牛黃

味苦甘性平清心包之熱痰退陽毒之發狂

元參

味苦鹹性寒治風熱頭痛腹中寒熱積聚火亢滋水解斑毒利咽喉通小便消癰瘰

竹捲心

味苦甘性寒滌心包煩熱除胸膈熱痰 竹葉主治略同善利小便 竹茹止

嘔逆

青黛

味鹹性寒瀉肝火消斑毒解蘊蓄風熱吐咯血痢斑痧痘疹發頤大頭溫癰腫
宜用之

白芍

味苦酸性寒瀉肝安脾肺收胃氣補腎氣斂肺定喘止下利裏急後重 赤芍
主治略同耑行破瘀小便赤澀咽喉紅腫丹毒斑疹

甘蔗

味甘性平除熱止渴利大腸

梨汁

味甘性平止煩渴清熱嗽利胸膈滑二便

菘豆

味甘性寒清熱疾而止渴去浮風而潤膚厚腸胃解百毒

芒硝

味鹹辛苦性寒能軟堅逐痰癖推陳致新 元明粉功用較緩性亦猛烈

大生地

味甘性大寒涼血益陰去瘀生新通二便消宿食

生牡蠣

味鹹性寒固精澀便止汗救脫

黃柏

味苦性寒瀉龍相二火利膀胱濕熱目赤口瘡黃疸洩痢

生鼈甲

味鹹性寒解骨蒸虛熱散心腹癥癖瘡母陰虛堪爲至寶

龜甲

味鹹性寒育陰潛陽退熱止利

桃仁

味苦甘性平治熱入血室如狂蓄血通大腸潤肌燥

卷之十終

跋

傳染病八種證治晰疑一書 先師巽軒曹公所編訂者也成於民國七年當時晉綏鼠疫盛行傳染頗廣政府特設防疫會總理此事其嚴重可知惜乎會中醫師專從西法重於防而忽於治以致患者多不治而死 先師乃力主中醫治疫經驗宏富可與西醫防疫並行之議頗爲防疫會長江宇澄將軍所採納於是親往大同設院治療病者獲救頗眾中西醫士咸爲翕服及歸徇 江公之請著成此書 忝列門牆蒙授抄錄錄畢嘗謂此書在知醫者讀之可以認證治療不知醫者讀之亦可辨別醫方因請梓行俾廣流傳 先師以書成倉卒尙待細校再印厥後正擬親爲校訂適患胃痛初未料自此以後一病卽不起也今者 孝標師兄刊印斯書可謂克盡 先師遺志矣第書中名稱有與現時通行者微有出入用特詳叙於後俾讀是書者知其所指焉原書卷二溫役證治係專指鼠疫而言此證西名 *Post* 又名百斯篤者從音譯也卷三猩紅熱證治係專指溫疹之熱重者而言與西名 *Scarlet fever* 證不同蓋

彼指咽喉疼痛併發紅疹之證卽陳耕道所謂疫痧者是也卷四傷寒證治雖未備述然我國醫書所論者皆爲冬時所感之正傷寒至丁氏所述傷寒證候卽西名 *Typhoid fever* 證則適合於中醫之濕溫證也卷五斑疹證治係包括發斑與痧疹兩證而言發斑卽西名 *Typhus fever* 證日名發疹窒扶斯者卽此證之譯名也至於痧疹亦爲傳染病之一種小兒懼者最多西名 *Measles* 者卽此證也卷六白喉證治卷七天然痘證治卷八霍亂證治三種論證治法俱與現在通行者相同卷九赤痢證治係包括赤白諸痢症而言比之西名 *Dysentery* 證較詳蓋西醫之赤痢爲痢證中之一種卽中醫所謂疫痢是也方茲刊印伊始用不自揣鄙陋略貢愚見以就正於有道時

民國廿一年十一月門人中山鄧曰仁子厚甫敬跋

我家自 先曾大父以來世操活人術至 先君巽軒府君而醫名幾播
全國與 先伯父智涵公君直公如驂靳 府君少年時受 先大父實
甫公庭訓隨侍應診卽嶄然露頭角嗣游京師爲溥玉岑尙書紹越千太
保暨世文端公所識拔被徵診視 隆裕皇太后疾譽望益隆民國初
奠見知於 大總統徐公曹公銜命爲各省軍民長官視疾所至有功
由是馳驅國事贊襄實多蓋醫疾而兼醫國矣丁戊之際任晉綏防疫會
員事竣江宇澄會長命將在事各員治疫方法彙輯成書加以纂定 府
君乃與同志斟酌古今分門纂述刪繁挈要定爲十卷當時未及刊行忽
忽十餘年 府君遽棄人間今夏又值北方時疫蔓延爰檢篋中纂定原
稿付印以資流布庶幾 府君與諸同志濟世苦心不至湮沒 岳峻 於醫
學愧無一知恐不免有訛謬失校之處惟冀有道君子不吝教正焉

歲在玄默涪灘陽月 男岳峻 謹跋

